

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido mat-sesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu —quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi. ² Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia. ³ Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec. ⁵ Aton Mado

Esuquidistu Nuquin Papan bēdamboen iste tantiamequidquo nec. Abia aton dada unēstiapimbo icquid icmequin uincuemiadquidquo nec. Adquid yec abitedishun Icbombo nec. Ambiuidtsēqui chuiquid dapa abitedimbo namendac. Aidquio nuqui tantiaquidquo yec nuqui ic-said bedshunuec abided cuidadec unēspondash. ⁶ Abi tantisho Esusēn aton Papan yuabo nuqui icmec. Aden Nuquin Papan chiacpadomboen naquin: —Con matses bēdamboen ista —quequin Nuquin Papa chianequidquo nuqui nec. Adquido icquin: —Esus bēdamboshē iquec. Abitedishun Icbombo nec. Ambi chiacpadomboen abitedishun napashun —canuna ēnenquo icquin. ⁷ Aidquio tantianuna. Nēbi chonoshe. Abitedishun Icbombo yec dacuēdampamboec chosho matses abitedishunquo isendac. Con matses ambi unēs uaondaidquo chosho istanec: —Padtemboshē. Ashibi cuidpec —quetanec cuidte tantiec dacuēdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac. ⁸ Adnubien Nuquin Papan chioshi. —Ēmbi tantiacmaid nibēdec. Abitedi comapenen tantiaquidquo nebi. Nidaid uabi yec ictenedi nebi. Nēbi adquid yec nibēdantiapimbo icquidquo nebi. Adquid yec abitedishun Icbombo nebi —queposh Nuquin Papa. Aidquio tantianuna.

Dacuēdampamboecnu Esusēn ismiaid

⁹ Esusbēd ictened Uan nebi. Mibēdtan Esus tantiaquid yec min utsibimboecquid nebi. Mibi yacpadembidi Esus tantisho Esus tantiesabon chieshēmpondashi. Adoac Esusēn namiacpadec chieshtoenquo iquebi. Chieshtoesa yec Nuquin Papabēd tabadtequido nuqui nec. Esus tantiesabon chieshēnquin quēnēn nauedacbimboen cuemenquo icnuen acte dapa nuacquid mad caid nēnantan nidaid icquid Pacmos caidēn tsadumpondashi. Adondac Pacmos caidēn abi tsadec nebi. ¹⁰ Dominco ushēn

Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncac bimboec comapenec onquesho tantiapombi. Ushenquo icquimbi ushquin isac bimboen tantiombi. ¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aidedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiadquin isquien tabote manitsinaid 7tedi icposh. Shocosh piu nacnenaiddquo neposh. ¹³ Aid nënantanquo Esusquo icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiaccosh. Abi shictonquete bëshpiu-bëshpiuctsëcquid nuacquid dapambo icposh. ¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naiddedi tanti-aquidquo nec —camenuc cuëte isquid bimboec aton ëshë isquid-isquidquo icposh. ¹⁵ —Ütsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaidd bimboec nacnacquo aton taë icposh. —Nuquin Papapadquidquo nec —camenuc acte chododoquiac bimboec comapenec onqueposh. ¹⁶ Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquo nec —camenuc adposh.

Aton bētantete ushëbimboec bëchamauanquiecposh. — Bëdambo icquidquo nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësaniacimboec padishec. Adshobini Esusën camishquin bëdameposh. —Dacuëdenda. Nuquin Papapadquidquo nebi. Nidaid uabi yec ictenedi nëbi adquid yec nibëdantiapimbo icquidquo nebi. Adquid yec abitedishun Icbombo nebi. ¹⁸ Adquid yequi mat-sesën unës uaid yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac —queposh Esus.

¹⁹ Adashic abi onquec: —Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chuibodëbëdta ëmbi ismeboedtsen chuiquin dada uabanta. ²⁰ Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuibansho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi — quequin aden ismeposhi Esusën.

2

Epeso yacnocquido Esusën chiaid

¹ Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. —Ëbi tantiaquido chuibanquidën Icho yec ëbi tantiaquidobëd iquebi —quequin aden ismeposhi.

Adshumbic naden chuiposhi. —Epeso yacnocquidon ëbi tantiaquidon iste ëmbi naden chuiboed dada uata. “Tantia, Epeso yacnocquido. Mibitedi chuinu. ² Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Ëbi tantiaquido icsamenuen chiec: ‘Esusën namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc. ³ Adembidi utsibon chieshënaqui chieshtoenquo icquin Nuquin Papan chiaidbëdta ëmbi naid mimbi chuibanoc.

⁴ Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquo icquin mimbi utsibotsen tantiaquiopadenec. Adodenedëmbi pacuënëdacimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec. ⁵ Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ qeshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquo icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquo ictsiandac. ⁶ Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen icsamboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi. ⁷ Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën:

‘Icsamenu,’ caqui chieshtoenquo icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëndamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniabimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata — quequin Esusën chuiposhi.

Esmidina yacnocquido Esusën chiaid

⁸ Adshumbic Esusën padpiden chuioposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmënquidon unës uacsho chococaqui uincuem-paccondash. Adondaaid yec unësaid uincuemequidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu. ⁹ Èbi tantiaquido icsho utsibon chieshënac mimbi dayun uaid nibëdquendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëndamboshë iquendac. Chieshëmënquidon mibi icsamboen chuishumboedtsen tantiemi. Mibi yacnoshon Satanasën namiac: ‘Isadaidbo nebi,’ quequidon mibi icsamboen chuishunosh. Nuquin Papan con matses caido yequi Nuquin Papan yuapenquo yec Satanasën yuaboen nec. ¹⁰ Aido tantiashe: ‘Ashibi mëyampatsiashe,’ quec dacuëndenda. Satanasën: ‘¿Ada Esus tantiaquido chieshtoenquo ictsiashe? Tanu,’ quequin namiacpadomboen chieshëmënquidon mibi utsi-utsien quënën nauedbanendac. Adoac daëdpactsëc ushec mibi mëyaden-dac. Puduenabi yec chieshtoenda. Chieshëmënquidon:

‘Esus tantiaquido icsho mibi cuesunenu,’ caqui chieshtoenda. Aidon cuesuniacsho mibi Nuquin Papa yacno puduedmeshun ëbëdi tabadmendambi. ¹¹ Nëbi ëbi tantiaquido utsibotsen chuinu. Ëmbi Esmidina yacnoquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantitata. Chieshtoenquo icquin ëbi tantiasho isun icsaido cuidquiacno nësecainquo iquendambi,” quequin ëmbi chuiboed dada uata —quequin chuiposhi Esusën.

Pedcamo yacnoquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuioaposhi. — Pedcamo yacnoquidon ëbi tantiaquidon iste ëmbi naden chuiboed dada uata. “Tantia, Pedcamo yacnoquido. Mibitedi chuinu. ¹³ Mibi yacno Satanasën yuabo dadpen icnuc ëbi tantiec mibi chieshtoenquo iquec. Ënden Satanasën namiac mibi yacnoshon chieshëmënquidon con yua Antipas caid cuesunepondash. Aidën chieshtoenquo icquin ëmbi naid chuibansho cuesuniacsho isumbic adembidi chieshtoenquo icquin mimbi ëbi tantiaquio-pondac. Aden mimbi bëdamboen naid tantiembi.

¹⁴ Adondaaid tantiaquin mibi icsaidtsen chuinu. Mibi cuëdüncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: ‘Isadaidbo aquec cho,’ cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshombic ambi papa caid Nuquin Papapenquo tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsami-

anquido mibëd iquec. Aido cuemepatecnëdan mimbi.
¹⁵ Adec nicadaitabo caido ëbi tantiante shubun puduedash
 mibëdi cuëdëncuededec icsamiente bumpec. ¹⁶ Aidon
 chiaid tantienda. Ëmbi chiaid mibi niac-niacmenushe.
 Aidobëd tabadenda. Mibi cuëdëncuededacno chomenda.
 Ëmbi chuiboed niacbidansho isun con ana shëcuënuësh
 cueshqueboedën chështen cuesacimboen mibi cuidtsi-
 ambique. ¹⁷ Nëbi ëbi tantiaquido utsibotsen chuinu.
 Ëmbi Pedcamo yacnocquido chuibocpadomboembidi con
 Mayanën mibitsen tantiametsiashe. Pabiate cuembo
 icquin ëmbi chuiboed tantiata. Chieshtoenquo icquin
 ëbi tantiasho bëdambo icmendambi. Nuquin Papan
 isadaidbo mana caid pemedenequin dayun uacpadom-
 boen mibi bëdamboen tabadmendambi. Adshumbic:
 ‘Ëmbi tantiaidquio yec ëbi yacno puduedtequid nec,’
 qeshun cuënote ushu menendambi. Abi cuëmëdquid
 icnubi utsi uain cuënquin aid cuënoten dada uatanquin
 menendambi. ‘Ëmbi meneboedënuidtsëqui ma isnu,’ que-
 quin adoendambi,” quequin ëmbi Pedcamo yacnocquido
 chuiboed dada uata —quequin chuiposhi Esusën.

Tiatida yacnocquido Esusën chiaid

¹⁸ Adoshombic aidëmbidi padpiden chuioaposhi. Cuëte
 isquidbimboec aton ëshë isquid-isquidquio yequi aton taë
 shocosh piubimboec nac-nacpambo icposh. —Icsaisambo
 yec Nuquin Papan Madombo nec. Adquid yec abitedishun
 naid tantiaquidquio icquin matses cuidquidquio nec —
 camenuc adquio isadquidën naden chuiposhi. —Tiatida
 yacnocquidon ëbi tantiaquidon iste ëmbi naden chuiboed
 dada uata. ¹⁹ “Tantia, Tiatida yacnocquido. Mibitedi
 chuinu. Mimbi naid abitedi tantiembi. Ëbi tantiaquin
 mimbi utsibotsen bëdamboen tantiec. ‘Aton Papabëdtan
 Esusën bëdamboenshë natsiash,’ quequin chieshtoenquo

icquin mimbi ëbi tantiec. Adquid icquin ëbi tantia-
 menuen utsibo nashunquido mibi nec. Ëbi tantiesabon:
 ‘Padi. Esus tantienda,’ caqui mimbi chieshtoenquoio icquin
 ëbi tantiapec. Tauamboen ëbi tantiaquin daëdpactsëc
 naondaidi nëbi ëbi tantiaquioshon ëmbi chiacpadomboen
 mimbi dadpen naic.

²⁰ Adec utsi-utsiec bëdambo icnubi icsamianquid chido
 abi iquec. Aid mimbi cuemepatecnëdan. Aid cue-
 menquoio yec mibitedi icsaic. Mimbi cacumiabi mibi
 iccuededacno isadaidbo tsusedpan chido Esabed caid-
 bimboecquid chido icsamboshë icquid muanuec pudued-
 posh. Puduedshumbic: ‘Nuquin Papan chiaid chuiquid
 nebique. Tantia. Chuinu,’ quequin abi bunaiduidquoio
 chuibanosh. Adoac ëbi bëdiactsëc tantiauidtsëcboedi
 aidën chiacpadec icsacuededposh. Nuquin Papapenquoio
 utsibon papa caid tantiabededacno puduedposh. Ad-
 shumbic aidon papa quequin dasamboed nëish pichicaid
 pec tabadcuededquimbi aton chidopenquoio chudbeded-
 posh. ²¹ Adsho isun aid chido: ‘Ma abi icsaid ënu,’
 qeshun badedquoio cuidenquoio iccombi. Adoboqui abi
 icsaid ënte bunenquoio iccosh. ²² Adec abi icsaid ën-
 tiapimbo icsho isumbimbi nëbi cuidendac. Ëmbi nac
 daicsabudash mëyadquiec aton ueten uendac. Ambi chi-
 acpadomboen naquido adembidi mëyadquionoc cuiden-
 dambi. Aidon ambi naid ënshoembi cuidenquoio ictsiaç.
²³ Aid chido cuidquoiquimbi aton bacuëbobimboecquido
 aidën chiacpadomboen naquin ëntiapimbo icquido adem-
 bidi cuidquiendambi. Ëmbi adosho isun ëbi tantiaquidte-
 dishun: ‘Matsesën otacquio tantiaid tantiaquidquoio Esus
 nec. Adquid icquin abi icsaid ënenquoio icquido cuidquin
 abi tantiaquido bëdambo icmendac,’ quequin tantiatsi-
 ash.

²⁴ Tantia. Ambocquido ëbi tantiaquidombotsen chuinu.

Aden Satanasën chuimiadën chuisho: ‘Aden chuisho tantiatiapimbo iquebi,’ mimbi capoc. Aden bēdamboen nasho isun utsi chienquo iquemi. ²⁵ Nēiduidtsēqui chuinu. Mimbi bēdamboen nabocpadomboen chieshtoenquo icquin ēbi tantiata. Ēbi choabi yacpadembi adota. ²⁶ Choshombimbi chieshtoenquo icquin ěmbi chiacpadomboen naquidombo ěbēdtan chuiquid dapabo icmendac. Adoac ěbēdtan matses utsibo abitedi namendac. ²⁷ Aden Nuquin Papan aido ěbēdta chuiquid dapa icmiacsho utsibon: ‘Dēniacquin ěmbiquen nanu,’ catiapimbo iquendac. Ēbi chieshēnquido: ‘Esus dēniacquin ěmbiquen matses namenu,’ quesho tantiashun matsu nacnenquidēn ambi nacnenaid icsambo icsho isun posposacimboen cuidquiendambi. ²⁸ Badiadte anoentsēc uispa dapa choded-chodedbocpadquiec ěnēdenquo yec ēbi tantiaquidobēd iquendabi. ²⁹ Ēbi tantiaquido utsibotsen chuinu. Ēmbi Tiatida yacnocquido chuibocpadomboen Nuquin Papan Mayanēn mibitsen pausuntsiashe. Pabiate cuembo icquin tantiata. Chieshtoenquo icquin ēbi tantiasho adembidi bēdambo icmendambi,” quequin ěmbi chuiboed dada uata —quequin chuiposhi Esusēn.

3

Sadis yacnocquido Esusēn chiaid

¹ Adoshombic Nuquin Papan Mayan abi tantiaquidobēd tabadmequidquo icquin Esusēn padpiden chuiposhi. — Abi tantiaquido chuibanquid namequid nec —camenuen uispa 7tedi sananquin ismeboedēn naden chuiposhi. — Sadis yacnocquidon ēbi tantiaquidon iste ěmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiemi. Bēdamboec tabadquido danquin utsibon: ‘Bēdambo icquido nec,’ mibi canubi ěmbien adotiapimbo iquēc. Mibi bēdāpenquo

iquec. Unēsacimboen mimbi ěbi bēdamboen tantienquio iquec. ² Isucunacimboen ěbi padpiden tantiaquiota. Nuquin Papan chiacpadomboen mimbi nauidsēccoque. Mimbi ěbi tantienquio iqueque. ‘Nuquin Papan chiacpadquiec bēdamboec tabadnuna. Esus tantiaquionona,’ cananta. ³ Mimbi ěbi tantiabenondacpadomboen ěbi tantiaquiota. Bēpiscudenda. Nēbi mibi icsaid ěnshun ěmbi chiacpadomboen naoata. Isucunenquio yacimboen ěbi tantienquio icshoembi mibi cuidendac. ‘Ampequid choec,’ quequin tantienquio yacimboen ěmbi cuidte tantienquio icsho mibi cuidtsiambique. ěbi tantiaquiota.

⁴ Mibi yacno icsaquido dadpen tabadnubi utsi-utsiec daēdpactsēc ambi naid icsa ucudacimboec icsainquio yec bēdamboec tabadec. Adec bēchish ucudacimboec abi icsaid ěnash bēdamboec tabadsho isun ěbēdi tabadmequin icsaisa icmendambi. ⁵ ěbi tantiaquido utsibotsen chuinu. ěmbi chuibocpadquidēn chieshtoenquio icquin ěbi tantiasho adembidi bēdamboen isun Nuquin Papa yacno ěbēdi tabadmequin icsaisa icmendambi. Aido cuēmēdquid cuēmēdquidquien Nuquin Papa chuibanendambi. ‘Aido ěbi tantiaquidotedi neque. Nuquibēd tabadmenuna,’ quequin adoendambi Nuquin Papan abi yacnoshon uaido mayan bēdabontsen tantianuc. Aden dada uaid ucudenquio yacimboen bēshunenquio icquin ěbēdi tabadtequido abitedi tantiembi. ⁶ ěmbi Sadis yacnocquido chuiboed Nuquin Papan Mayanēn mibitsen tantiametsiashe. Pabiate cuembo icquin bēdamboen tantiatata. Chieshtoenquio icquin ěbi tantiasho adembidi bēdambo icmendambi,” quequin ěmbi chuiboed dada uata —quequin Esusēn chuiposhi.

Pidadepia yacnocquido Esusēn chiaid

⁷ Adoshombic icsaisambo icquin ambi chiacpadom-boen naquidënquio Esusën padpiden chuiposhi. Con tsusedpa Dabid yampicpadquid matses namequidquio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata. ⁸ “Tantia, Pidadepia yacnocquido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquio icpatsi-aba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquio mibi iccoc. Adec chieshtoenquio icsho isun ëmbi namiac ëmbi naid mimbi chuiban-chuibanendac utsibon ëmetiapimbo icquin. ⁹ Aden isadaidbon mibi ëmetiadquio iquec. Aido: ‘Con matses isadaidbouidtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno cho-chosho mimbi chuibanendac. Adoac: ‘Ai, abimboen mimbi caoc, Nuquin Papan Madon Esusën tantiaidombo mibi nec,’ aidon mibi caindac. ¹⁰ Ëmbi chiacpadec chieshtoenquio icquin ëbi tantiasho isash mibi cudasendabi. ‘¿Ada Esus tantienquio yantsiashe? Tanu,’ qeshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquio icquid icmendambi.

¹¹ Tantia. Nëbi choendabi. Utsibon chieshënaqui mibi icbocpadquiec chieshtoenquio yec bëdamboec tabadta. ‘Ëbi adenquio icsho isun Esusën abi yacno puduedmenquio ictsiashi,’ quiash bëdamboec tabadta. ¹² Aden chieshtoenquio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiq-

uidtiapimbo yacimboecnuc con shubun icquido mibi icmendambi auëshquio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi. ¹³ Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuiboed dada uata —quequin Esusën chuiposhi.

Daudiseya yacnocquido Esusën chiaid

¹⁴ Adoshombic abitedishun naid tantiaquin abimbo chuiquidënquo Esusën padpiden chuioaposhi. Nidaid-bëdta abitedi uaquidënquo abitedishun Icbon chuiposhi naden. —Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu. ¹⁵ Mimbi naid tantiëmbi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopen-dactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëcoc. Adsho tantiashun: ‘Dayacquio yacimboen ëbi tantiaquiopashun,’ caimbi mibi. ¹⁶ Mibi adec chieshtonoc ëbitsen chieshtotiadquo iquebi. ‘Cacumiabimboen Nuquin Papa yacno ëbëdi mibi tabadmenquo iquendambi,’ mibi catiadquo icchitebi. ¹⁷ ‘Nuquin Papan chiaid niacniaquec icsapobi,’ quetiadquidi: ‘Ëmbëmbi con na dadpen bedshun dayun uaic utsi bunenquo yec bëdambo iquebi,’

mibi quepoc. ‘Esus tantienquo yec Nuquin Papabéd tabadtiapimbo icchitebi,’ quetiadquidi mibi adenquo iccoc. Nuquin Papa yacno tabadte tantienquo icsho isun mibi shubiuatiadquo iquebi. Béchish ucabi yacbimboen mibi icsaid ènabi icsho mibi bédamboen istiapimbo iquebi. Pacuënédacimboben èbi tantienquo mimbi iquec. ¹⁸ Adboedëmbi Nuquin Papabéd tabadte bunquin èbi tantiaquiota. Èbi tantiaquin béchish ucacimboben mibi icsaid ènta. Adsho icsaisabimboecnuc mibi bédamboen isquin èbèdi tabadtequid icmetsiambique. Pacuënèdaid paposhquiacbimboecnuc èmbi naid mibi bédamboen tantiametsiambique. Èbi tantiata.

¹⁹ Èmbi tantiaido bédamboen tantiamembi. Aton papan: ‘Padi, mibi icsambo iquec,’ quequin bacuë èmiacimboben èbi tantiaquido icsasho isun ambi naid èmenuequin natiambo icmendambi. Èbi tantiaquin mimbi icsamboen naid ènash bédamboec tabadta. ²⁰ Mibi tantiaquiembique. ‘Èbi tantiata,’ èmbi cac mibi: ‘Ai,’ qesho tantiash mibéd iquendabi. Pec tabadec bëisanquiacbimboec mibéd iquendabi. ²¹ Tantia. Èbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aibdèdi tabadquid nebi. Adquid yec aibdèdi abitedishun Icbombo nebi. Adembidi èmbi con Pan chiaid nacpadec chieshtoenquo yec èbi tantiec tabadsho èbèdi tabadmequin èbèdtan chuiquid icmendambi. ²² Èmbi Daudiseya yacnocquido chuibocpadomboben Nuquin Papan Mayanën mibitsen pausuntsiashe. Pabiate cuembo icquin bédamboen tantiata. Chieshtoenquo icquin èbi tantiasho adembidi bédambo icmendambi,” quequin èmbi chuiboed dada uata —quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc is-pombi. Adshun isquien shëcuë shëcniac bimboec isadpec. Adnubien chuibocpadquiec shoncac bimboec comapenec onqueoaposh. —Nëmbo cho. “Nadquid iquendac. Nadot-siandac,” quequin mibi dadpen ismenu —caposhi.

² Adoac Nuquin Papan Mayanën tantiamiac ambo nidac bimboen ispombi. Ushquin isac bimboembimbi caindac. Adshun isquien Nuquin Papambo chuiquid dapan tsadte dapanquio tsadpec. ³ —Chuiquid dapa abentsëcquibi nec. Bëdamboshë iquec —camenuc matses bunaidquio casëdubimboec nac-nacquio yec pi-umbo yec bëdamboshë isadposh. Abi tsadaid nënantanquio uenquebudpamboec uen podqued bipamboec umu-umupambo icposh. —Bëdamboshë icquidquio nec —camenuc adquio icposh. ⁴ Nuquin Papa nënantan icnuc abi dacuenadec matses tsusiobo Esus tantiaquido chuiquido 24tedi icquido tabadposh. Chuiquid tsadte utsi 24tedi tsadte icnuc icbo-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquio dasiuidcuededposh. Chuiquid dapan mauetembo shocosh nacnenaidquio mauecuededposh. ⁵ Adnubien Nuquin Papa yacnuësh abubimboec bed-bedquetanenubien abu tesquianiac bimboec cuëdtoposh. —Abitedishun Icbombo nec —camenuc adec cuëdtoposh. Nuquin Papan bëntsiaucquio tabote taboaid 7tedi icnuc tabëcaid icposh. —Aton Mayan abentsëcshun Nuquin Papa bëisquioquimbi abi tantiaquido chianequid yequi Esus tantiaquidobëdtsen icoaic —camenuen aden ismeposhi. ⁶ Bëntsiaucbidi actepenquio chian dapa acte-actectsëcquio isadposh.

Nuquin Papa tsadaid anoen daëdtsëcquio abi dacue-nadec aben icquidbimboecquid 4tedi icposh. Dadano chedobi ëshë ictsëcquieci icposh. Utsi tanenquio. Abimbouidquio istequidquio icposh. Cachoc icnubi tacbiduc adquiobidi icposh. ⁷ Abentsëc bëdi dapambo tëbuchoquidbimboec icposh. Utsibic baca bënëbimboec isadposh. Utsibic matsesën bëtantetebimboec bëisadposh. Utsibic chiqui dapabimboec isadposh. ⁸ Icbo-icboec aton podò uicchunën podobimboec 6tedi icposh. Podonotsen adquiobidi ëshëuidquio isadposh. Podò ananquio adquiobidi icposh. Aidonquioibi ënenquio icquin Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.

Abitedishun Icbombo mibi icnuc mibipadquid utsi nibëdec.

Abitedimbo tantiaquidquio mibi icnuc mimbi tantiacmaid nibëdec.

Matses uabi yec icpampidi mibi nec. Nëbi adquid yec mibi nibëdantiapimbo icquidquio nec

—quec badiadquidën badiadquidënquieci cuëdëdashic inchëshëntsen cuëdëdeneposh.

⁹ Aden dadanobi ëshëcquidon: —Mimbi nac bëdambo iquebi. Mibi bëdamboshë iquec, Papa. Abitedishun adembidi: “Bëdambo iquec,” mibi cac bëdambo ictsias, Papa —Nuquin Papa cadonenubi ¹⁰ tsusiobo 24ted icquido ambo tabadquido danëshën tinquëbudcuededposh. Adtanquimbi mauete chicbededtanquin Nuquin Papan tayun sambededposh: —Abitedishun Icbombo mibiuidtsëqui nec —quequin. Adotanquimbi aidontsen Nuquin Papa chuiposh nadec cuëdënquin.

¹¹ —Mibi bëdamboshë iquec, Papa. Adembidi abitedishun mibi: “Bëdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsēcquiobi mibi nec.

Mibipadquid utsi nibēdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mimbiuidtsēcquiobi abitedi uapampic.

Adoac mimbi tantiacpadequi mimbi uaido nibēdanabi yec abi iquec.

—quec tsusiobo cuēdēncuededposh.

5

Nuquin Papan chiacpadomboen namequid Esus isadaid

¹ Adshun isquien Nuquin Papan abiucshun ambi chiaid dada uaid sanampec. Abiuc daēdi dada uaid bidi-cabanquin: —Istemaidēn isnushe —qeshun 7ted icnuc bitaccatempin bitaccabanaid neposh. ² Adnubien Nuquin Papan abi yacnoshon uaid mayan bēda chuiquid dapa comapenec onqueposh. —¿Tsuntsin nēid dada uaid bedshun bitaccaid chicbanquin chuibampatsiash? —quedo-quedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh. ³ Adoquien ēcbedanenquio icposh abitedimbo. Nēidic Nuquin Papabēd tabadquidotedi. Nēidic nidaidēn tabadquidotedi. Nēidic unēsaidotedi. Aidtedi dada uaid bedshun bitaccaid chicbanquin istequid nibēdposh. ⁴ Adsho isahini unēsquio icnuc shubipoc: —Aid dada uaid bedshun chicbanquin chuibanquid nibēdec —quiash. ⁵ Adshobini anocquid tsusion: —Otac. Shubienda. Ēnēd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton

tsusedpa Uda yampid icnuc aton tsusedpa utsi Dabid-
bimboecquid chuiquid dapambo nec. Utsibon dēniacad-
tiapimbo icquid nec. Aidēmbi chieshtoenquo icquin
Nuquin Papan chiacpadomboenuidi naquidquo icquin
aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmen-
quo icnuen abided unēs uaid obeca bacuēbimboecquid
Nuquin Papabēd abi tsadacnombo isadtsec. —Matses
icsaid bedshunuec abided ciudadec unēsaid Esusquo nec
—camenuc adec isadposh. Utsibo dacuenadec tabadnuc
nēnantanquo Nuquin Papabēdquo icposh. Anoentsēqui
dadanobi ēshēcquido dacuenadec tabadnuc abi uquētsēc
tsusiobuidquo dacuenadec tabadposh. Padnuc obe-
cabimboecquid yec aton pais 7tedi icnuc aton ēshēbo
aidtedquiobidi icposh. —Abitedishun Icbombo yec utsin
dēniacdiapiambo icquid Esusquo nec —camenuen aden
pais ismeposhi. Adembidi: —Aton Mayambidi Nuquin
Papan Mayan yec nidaid utsi-utsiec yacno matses abitedi
yacno nidmiaid icnuc ompodēmēdtiapimbo icquid Esus
nec —camenuen ēshē 7tedi ismeposhi ushquin isacbi-
boecnuc. ⁷ Adshumbic obecabimboec isadboedēn Es-
usēn Nuquin Papan abiucshunquo sananaid dada uaid
bedposh. ⁸ Bedsho istanequien dadanobi ēshēcquidobēd
tsusiobo 24ted icquido Esus ismec danēshēn tinque-
budcuededposh. —Bēdamboshē icquidquo mibi nec
—quiash adcuededposh. Tsusiobon icbo-icboen ten-
tencate sananquimbi utsiucshun shocoshēmpi bēdambo
nuadnuc tauitempi sanamposh. —Ēmbi ten-tencamequin
Nuquin Papa cuishoncamiacbimboec Esus tantiaquido
cuēdēnaid iquec —quequin aden ten-tencate sananquin
ismeposhi. Adembidi: —Nēshun tauiac nēid pushudquid
Nuquin Papa yacno nidacbimboec Esus tantiaquidon
chianaaid iquec —quequin bēdambo nuadnuc tauitempi

sananquin ismeposhi. ⁹ Adashic cuëdënte chucan Esus chiec cuëdëncuededposh tsusiobo.

—Mibi bëdamboshë iquec.

Nuquin Papan chiacpadec matses cuidmenquo icnuec mibided cuidadec unësondaidquo mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquo mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquo.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” cadedcadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquo icnuc anoentsëqui dadanobi ëshëcquidouidquo dacuenadec tabadposh. Abi uquëtsëc dacuenadec tsusiobouidquo tabadposh. Aid uquëtsëc dacuenadequic mayan bëdabouidquo tabadposh. ¹² Adec tabadec mayan bëdabo abitedimbo cuëdëncuededposh naden chiec.

—Isadaidbon obeca bacuëded cuidacimboec matses ic-said bedshunuec abided ciudadec Esus unëspondash.

Esusquo bédamboshë icquidquo nec.

Adquid icsho: “Abitedishun Icbo icquin Nuquin Papan chiacpadomboen namequidquo mibi nec,” abitedishun capashun.

Adembidi: “Mimbi uaido yec mitsana abitedimbo nec.

Comapenen tantiaquid mibi icnuc mimbi tantiacmaid utsi nibëdec,” abitedishun capashun.

Adembidi: “Mibi bédamboshë iquec. Mibi tanti-aquiemi,” abitedishun capashun

—quec cuëdëncuededposh mayan bédabo Esus tantiec.

¹³ Adnubien Nuquin Papan uaido abitedimbo cuëdëndocuededposh. Abi yacnocquidotedi yec nidaidën icquidotedi yec unësaid uincuemiaidotedi yec acten icquidotedi yec quec cuëdëncuededposh naden chiec.

—“Abitedishun Icbombo yec tsadte dapan tsadquidquo Nuquin Papa bédamboshë iquec.

Obeca bacuëbimboecquid abided ciudadec unësaid Esustsen bédamboshë iquec,” canuna, ënenquo icquin.

“Abiuidtsëqui Nuquin Icbo nec. Utsi adquid ictiapimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquo icquin

—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icbo bédamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

¹ Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacbimboec comapenec cuëdquin: —Cho —caposh. ² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquio mibi nec —quetanquin chuiquid dapan mauetembo mauemeposh. Adoac adecbidi abi chieshënquido cuesun secanuec nidposh.

³ Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac ⁴ cabayo piumbo icquid catsadec dada choposh. —Matses cuesun secananenquio icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa matses siante dapa meneposh. Adomboen Nuquin Papan matses cuidte tantiameposhi.

⁵ Adnubien Esusën dada uaid bitaccaid udictsëcquid chicposh chicabi icquid 4tedi icnuc. Aid chicnubien dadanobi ëshëcquid utsintsen: —Cho —cac cabayo chëshëmbo icquid catsadec dada choposh. —Pete daëdpactsëc icmete chiec —camenuen pete yuë tante sanamposh. ⁶ Adnubien dadanobi ëshëcquido dacuenadec tabadnuc nënantanshunquio Nuquin Papan cabayo chëshëmbo icquid catsadquid chuiposh. —Pucquid dadpenquio meniac aton yuë daëdpactsëcnuc tambanshun pete utsi-utsien daëdpactsëc menianquid iquendac —quequin pete utsi-utsiec nibëdte chuiposh. Adshumbic: —Pete utsi-utsien nibëdmetanquin tiedën icquid pete utsi-utsien nibëdmenquio icquin nata —

quequin chuiposh. —Nuquin Papan cuidac adec pete nibëdnuc matses pete bunquiendac —quequin cuidte utsi aden ismeposhi.

⁷ Adnubien Esusën dada uaid bitaccaid udictsëcquid chicposh chicabi icquid 3tedi icnuc. Aid chicnubien dadanobi ëshëcquid utsintsen ënquimbi chuiquin: —Cho —cac ⁸ cabayo bëdiactsëc ushu-ushupactsëcquid catsadec dada choposh. —Aid matses unës uaquid nec —quequin cuënsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshë unës uabudnendac. Aidon namiac cuesun secananec dadpen naimëdbudnendac. Bunambi aidtedbidi unësbudnendac. Daicsaidëmbic aidtedbidi. Aben icquid uinsadpambo icquidën aidtedbidi acshun secaindac —quequin Nuquin Papan cuidte utsi ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chiaidbëdta Esusën naid chuibanec bëdamboec tabadsho aden cuesun secaido niosh. ¹⁰ Adoaido icquin comapenec cuëdquin Nuquin Papa chuidoneposh. — Abitedishun Icbombo icquin mimbi tantiacpadomboen namequidquido mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ;tedectsicshun mimbi cuidpe? —caquin chuidoneposh. ¹¹ Adoaquien: —Chiata. Yuec-yuecpectsëcshun naindambi. Min utsibobimboecquido ëbi tantiaquido utsibo ëmbi tantiactedi chieshëmënquidon ma cuesun secabono. Adoacsho isun cuesun secanquido cuidendambi —queposh. Adshumbic Nuquin

Papan: —Ēbēdi tabadmequin icsaisa mibi icmēmbi — qeshun abitiombi dasiuidbudte ushumbo icquid dasiimbamposh.

¹² Adshumbic Esusēn dada uaid bitaccaid utsi chicposh chicabi icquid abentsēc icnuc. Adnubien nidaid abichobi shēc-shēcquemboec comapenec uēdēqueposh. Nidaid uēdēquenubi abucuēsh chēnquequidtedi dacuēdampambo yamposh. Ushē dashcute chēshēn bēpu-cacbimboec inchēshquio icposh. Inchēshēn ushēbic intacbimboec piumboshē isadposh. ¹³ Uispabic natiambo cunquenuc cuēte bacuē tididiquiacbimboec nidaidēn tididieposh. ¹⁴ Abubic dashcute bidiquiacbimboec isadposh. Macuēsh dapabic abitedi manēdcuededposh. Acte nēnantan nidaid icquidic abitedi manēdcuededposh. ¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nēidic chuiquid dapabo dadpenquio. Nēidic aidobēdtan chuiquid utsibo. Nēidic sondado chuiquid dapabo. Nēidic aton na dadpen dayun uaquido. Nēidic cuesambo icquido. Nēidic matses yuabo. Nēidic matsesēn yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shēcucē dapan ompodnobi utsi-utsiec macuēsh dapa yacno cuēnote dapa dayun ompodposh. ¹⁶ Ompoduidtsash: —Macuēsh dapa cuitiadbudnec sebudnequin mabēspashuni. Nuquin Papan istuidshun cuidnushe —quenubien utsibo: —Cuēnote dapa abucuēsh paēdbudnequin ompopashuni. Nuquin Papan istuidshun cuidnushe. Adembidi abided cuidadec unēsaid Esusēnsen cuidnushe. ¹⁷ Aidon ambi tantiacpadēnquiobini nēbimbobi cuidchitec. Padtembo. ¿Tsutsi cuidenquio icpatsiashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi. Ismiac Nuquin Papan abi yacnoshon uaid mayan bëdabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icho-icboen uidën uaquin cuncamenquio icposh. —Nuquin Papa: “Ma cunquequidën icsa uabanu,” quiabi icnuc abembi cunquequidën nidaid yec acte yec cuëte yec quenuc icsa uanushe —queshun adoposh. ² Adnubien mayan bëda utsi ushë choacmiuësh choposh. Nuquin Papa abi tantiaquido cudasëmenuen dada uaquin bësete sanamposh. Aidën cunquequid uidën uaquido comapenec onquequin chuituidposh. ³—Chiata. “Nidaid yec acte yec cuëte yec quenuc icsa uanushe,” queshun adembi cunquequid uidën uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” queshun bësebambono —quetanquin Nuquin Papa tantiaquido bësebamposh ushë choacmiuësh choquidën.

⁴ Adshumbic ambi bësebamboed tambanquin chuibamposh. —Bëseboedtedi Acobo caidën madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë. ⁵ Nëidic Acobo caidën mado Uda caidën matses tsyuecquido 12,000tedi. Nëidic Acobon madobidi Duben caidën matses tsyuecquido 12,000tedbidi. Nëidic Acobon madobidi Cad caidën matses tsyuecquido 12,000tedbidi. ⁶ Nëidic Acobon madobidi Ased caidën matses tsyuecquido aidtedquiobidi. Nëidic Acobon madobidi Netadi caidën matses tsyuecquido aidtedquiobidi. Nëidic Acobon madobidi Manases caidën matses tsyuecquido aidtedquiobidi. ⁷ Nëidic Acobon madobidi Simeyon caidën matses tsyuecquido

aidtedquiobidi. Nēidic Acobon madobidi Debi caidēn matses tsyuecquido aidtedquiobidi. Nēidic Acobon madobidi Isacad caidēn matses tsyuecquido aidtedquiobidi. ⁸ Nēidic Acobon madobidi Sabadon caidēn matses tsyuecquido aidtedquiobidi. Nēidic Acobon madobidi Ose caidēn matses tsyuecquido aidtedquiobidi. Nēidic Acobon madobidi Benamin caidēn matses tsyuecquido 12,000tedbidi. Aid abitedi tsinacquin tanac 144,000tedi icposh —quequin chuiposhi mayan bēdan. Aden Nuquin Papabēdta Esus tantiaquido dadpenquioshē ismeposhi. — Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bēseboedo 144,000tedi tambanquin ismēboshombic padpiden Nuquin Papa yacnombo ismeposhi. Adoac isquien Esus tantiaquido dadpenquioshē tabadpec. Tambantiapimbo yactedi iquec. Nēidic nidaid utsi-utsiec yacno tabadquido. Nēidic matses utsibo. Nēidic matsesquio. Aidtedi Esus tantiaquido neposh. Nuquin Papa Esusbēd tabadacnombo tabadposh. Abēdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesēn chuiquid dapa ismiac bimboen: —Nuquin Papa bēdamboshē iqueque. Ismenu —quequin niste podobiecquid sananquin uic-uiccaposh. ¹⁰ Aido comapenec cuēdēncuededposh.

—Abitedishun Icbo icquin Nuquin Papan ambi tantiacpadomboen isadaidbon obeca bacuēded cuidac bimboen aton Mado Esused cuidpanēdash. Adoac nuqui icsaid bedshunuec abided cuidadec unēspondash Esus.

Aid tantiasho icsaido cuidacno nidmenquio icquin nuqui abēdi tabadmec.

Aton Papabēd bēdamboshē iquec

—quec cuëdëncuededposh.

¹¹ Adsho tantiash ambo tabadquido mayan bēdabotedi danēshēn tinquebudcuededposh. —Nuquin Papabēd Esus abided cuidadaid bēdamboshē iqueque. Ismenuna —quiash adposh. Nēnantanquio Nuquin Papabēd Esus tabadnuc abi uquētsēc dacuenadec dadanobi ēshēcquido 4tedi icquiduidquio tabadposh. Abi uquētsēc dacuenadec tsusiobo 24tedi icquiduidquio tabadnuc abi uquētsēc dacuenadequic mayan bēdabouidquio tabadposh. ¹² Aid mayan bēdabotedi danēshēn tinquebudcuededequi comapenec cuëdëncuededposh.

—Aden abi tantiaquido abēdi tabadmequid bēdamboshē iquec.

Esusbēdi Nuquin Papa bēdamboshē iquec.

Adembidi abitedishun: “Mibi bēdambo iquec, Papa,” quequin chuipashun.

Esusbēdi Nuquin Papa bēdamboshē iquec.

Abipadquid utsi nibēdec.

Comapenen tantiaquidquio icnuc ambi tantiacmaid utsi nibēdec.

Aiduidtsēqui bēdamboen tantiaquidquio nec.

Aidēn nashunac bēdamboshē iquebi.

Nadatiambo icquid nec. Abitedishun Icbombo nec.

“Esusbēd Nuquin Papa bēdamboshē iquec,” canuna

—quecuededposh mayan bēdabotedi.

¹³ Adshumbic ěmbi 24ted icquid isboed abentsēcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuēshquio aido chosh? —cac: ¹⁴ —Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasēn: “¿Ada chieshtoenquio ictsiashē? Tanu,” queshun natiamboshē icmiac Esus tantiec chieshtoenquio ictenedo nec. Adec chieshtoenquio icsho isun

Satanasën tantiacpadomboen chieshëmënquidon unës uapondash. Abided ciudadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh. ¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquio icquin tantierendac. Adembidi Nuquin Papan: “Con mado mibi nec. Con champi mibi nec. Nuquiabi icnu. Cho,” qeshun abëdi tabadmequin bëdamboen dayun uaic. ¹⁶⁻¹⁷ Isadaidbo matsesën nëish yua obeca dadpen dayun uacpaden abided ciudadec unësaidën Esusën abi tantiaquido bëdamboenshë dayun uaindac padpidec unëstiapimbo icnuc. Adoac pete bunenquio iquendac. Actetsen bundoenquio iquendac. Abi yacnuësh ushën pichiquenquio iquendac. Chun mëyadenquio iquendac. Nidaidënuësh shubidenedi Nuquin Papa yacnuësh shubitiapimbo iquendac. Natiamiante nibëdquiec iquendac. Unësquio icmiante nibëdquiec iquendac. Bacuë shubisho anin bëucquin bëdambo icmiacbimboen abi yacnoshon Nuquin Papan Esus tantiaquido bëdambouidquio icmendac —quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. —Dacuëdampambo iquec —quec media oda yec yuec-yuecpectsëc otacquo tantiec tabadposh. ² Adnubien Nuquin Papan abi yacnoshon uaido mayan bëdabo sietetedi: —Nuquin Papan chiacpadomboen nanu —quec tabadposh. Adsho isun icbo-icboen shoncate sietetedi menebamposh. ³ Adnubien mayan bëda utsi

ambobidi choposh. Choash bēdambo nuadquid tauin-uequin shocosh nacnenaid tauite dapa dayun nidtuidposh. Shocoshēmpin bēdamboshē nuadnuc taitempi utsi sanamposh. Adsho isun bēdambo nuadquid nua meneposh. Adoac: —Nēid tauiac pushudquid Nuquin Papa yacno nidac bimboec Esus tantiaquidon chianiaid iquec —quequin bēdambo nuadquid sanshun tauite nacnenaid dapan tauiposh bēdambo nuadnuc. ⁴ Aden tauiac Nuquin Papa yacnombo pushudquid nidosh. —Adembidi Esus tantiaquidon chianiaid abi yacnoshon tantiashun Nuquin Papan abi tantiaquido chieshēnquido cuidendac —quequin aden ismeposhi. ⁵ Adshumbic aid mayan bēdan tauite dapan samēdquid cuēte dētsisadaid isquidquio icquid bedshun shocoshēmpin sandoposh. Aden sandotanquimbic shocoshēmpichobi matses tabadacno masiabudposh. Nuquin Papa tabadacnoshon adoposh. Adnubien bed-bedquetanepamboec abu tesquianiac bimboec cuēdtoposh. Adnubien nidaid abichobi saca-sacaquemboec uēdēqueposh. —“Nuquin Papan ēbi chieshēnquido cuidpashun,” quequin Esus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuēte dētsisadaid isquidquio icquid masiabudnubien shoncate bedboedon mayan bēdabon shoncanuen sanamposh. ⁷ Adshumbic abentsēcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuēte dētsisadaid isquidquio icquid yec intac yec quenuc chomeposh ue dapa choac bimboecnuc. Aden chomiaidēn nidaid nuamboshē tauidposh. Cuēte dadpenquioshē tauidposh. Uasin dadpenquioshē pichiqueposh.

⁸ Adnubien mayan bëda utsin shoncaposh 5tedishun shoncabi icnuc. Shoncanubien macuësh dapatemi icquid nädënquepamboec abucuësh paëdec chian dapa mad caid nëpaëdposh. Adnuc chian nuamboshë intac yamposh. ⁹ Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

¹⁰ Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nädën-nädënquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh.

¹¹ Aid uispa acte muca uaquid niosh. Aid nëpaëdquin muca uaid acte acash matses dadpenquioshë unësbudneposh.

¹² Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoquien bëdambo chënqueboedi bëdiact-sëcquio chënquiantsëccosh.

¹³ —Aden Nuquin Papan matses cuidquiendac —quequin ëbi ismenubien chiqui dapa cuenequi matsesbimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësquioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

¹ Adnubien chiqui dapan chiacpadomboen mayan bēda utsin shoncaposh daēdshun shoncabi icnuc. Shoncanubien Nuquin Papa yacnuēsh mayan bēda badedquio budash matses yacno choposh. Adsho isun Nuquin Papan chiacpadomboen bētashte chictempi meneposh. Podobitsi icsabo uidēn uacno nidaid shēcūē uquēducquio icquid bētashte chichte neposh. ² Aid chictempin chicaquien uquēducūēsh tied nēdēnquedoacbipamboec pushudtoposh. Abuc inchēshquio pushudquid icnuc ushē isadenquio icposh. ³ Adsho isaquien pushudacnuēshquio tsectsecbiecquid dadpenquioshē cho-choposh. Chichumbimboec sianquidquio niosh. ⁴ Adsho isun aido chuiposh. Aton petembo caic: —Nuquin Papan tantiacpadomboen tiedēn caniquidbēdta cuēte podo penda. Uasintsen penda. Adembidi Nuquin Papan cudasquin bēsemiaido abi tantiaquido sebudnenda. Aido senquio icquin Esus tantiesabo bēsiadabi icquidouidquio sebudneta —quequin chuiposh. ⁵ Adshumbic: —Unēsnuć seshun secainda. Inchēshēn ushē 5tedi nidmequin chichunēn siacbimboecnuc sebudneta —cac tsectsecbiecquidēn sebudnequin ismeposhi. ⁶ Aid tsectsecbiecquidēn siac natiamboshē yec matses unēste bunquiendac. Unēste bunquidi badedi unēsenquio iquendac.

⁷ Aden tsectsecbiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsecbiecquid isadposh. Shocosh mauetebimboecquid mauecuededposh. Matsesēn bētantetembobi bēisadposh. ⁸ Chidon tēbucshumbimboec isadposh. Bēdin shētabimboec aton shēta icposh. ⁹ Bēntsiauc shicdiadquid cudaste shocosh nacnenaidbimboec sictsasimbo icposh. Aid abi maisi cuensho tantiac tied nēdēnquiacbimboec comapenec

cuëdposh. ¹⁰ Aid tsectsecbiecquid chishpichoquid yec chichumbimboec sianquidquio neposh. Inchëshën ushë 5tedi nidmequin adquidën dadpeshun natiamboshë icnuc matses sebudneposh. ¹¹ Abi nidmequid aton icbo Satanasën yuaido uidën uacnuësh choquidbidi niosh. —Unës uanquidquio nec —quequin isadaidbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daëd ismiabi icnuc.

Chiqui dapan chuiboed utsi

¹³ Adnubien shoncate sanamboedën mayan bëda utsin shoncaposh abentsëcshun shoncabi icnuc. Shoncanubien tauite dapa Nuquin Papan bëntsiauc tsadunaid yacnuëshquio onquedoshon tantiombi. ¹⁴ Adec onquidquidën nëbi shoncaboed chuiposh. —Acte dapa Eupëdates caid yacnoshon matses cuidquido mayan bëdabo 4tedi uidën uaccoshe. Aido nidmetan. “Mimbi tantiacpadomboen naic nid,” quequin chuitan —caquien chuitamposh. ¹⁵ Aden chuitanac aid mayan bëdabo 4tedishun matses dadpenquioshë cuesun secamenuen aton matses utsibo cuesun secate tantiamebeneposh. Nuquin Papan: —Adënquiobi adoendac —quequin tantiacpadomboen adoposh. ¹⁶ Adoquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaittedi chuisho tantiombi. —Dadpenquioshë iquec cuëte podotedi. 200,000,000tedi iquec —queposh.

¹⁷ Ëmbi isboedquio nadquio icposh. Abi catsadaid cabayobëdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bëshpiu-bëshpiu icquid yec queposh.

Cabayon mapi bëdi dapan mapibimboec isadposh. Ana shëcuënuësh nëdënquepamboec pushud-pushudpambo yec choposh. Cachinan bacuë pisenaid nuadac bimboec asupede caid icsamboshë nuadposh. ¹⁸ Adshumbien ana shëcuënuësh choaidën matses dadpenquioshë cuesun secabudneposh. ¹⁹ Aid cabayo chedon ana shëcuënuësh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidëntsen matses dadpenquioshë unës uabudnequin ismeposhi.

²⁰ Adnubien aden Nuquin Papan cuidaidën unës uamiabi yaidon matsesën abi icsaid ëntiapimbo icposh. Ambi naiduidi nabamposh. Ëntiadquidi abi icsaquioposh. Nuquin Papa tantienquio icquin podobitsi icsabo tanti-aquin ëntiapimbo icposh. Adembidi ambibi nacnenaid ambi papa caid ënenquio icquin tantiaposh. Utsibon shocosh nacnenaid tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaid anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquio icquin Esusquio tantiatiadquidi ambi nacenaiduidi tantiaposh. ²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquio chudquidombic adembi utsi chudshumbededposh. Adembidi aton bënëpenquio chudmequidën abi icsaid ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ëbi icsaid ënu —quetiadquidobi adenquio icposh.

10

Mayan bēdan dada uaidēmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bēda chuiquid dapa utsi dacuēdampambo icquidquio Nuquin Papa yacnuēshquio budsho ispombi. Abu ushubimboec isadec abitiombi dasiuidbudpaccosh. Uen podqued uenquebudacbipamboec mapino icposh. Ushēbimboec bētantete bēchamauanquiecposh. Buintad nitsinaid nēdēnquiacbipamboec isquid-isquidpambo nidte icposh. ² Dada uaidēmpi bēcadotsaid sanamposh. Budash nidtuidposh. Tsiembudcuenshun taē abiucshun chian dapa mad caid nētincaquimbi taē opiocshon mananuc tincaposh. Ēnapenquioshē icquid niosh. ³ Adashien bēdi noshquiacbimboec nuamboshē cuēdtoposh. Adec cuēdquin chiac abu 7tedec cuēdtonequin ēcbedtoneposh Nuquin Papan chiaid chuiquin. ⁴ Aden abu cuēdquin ēcbedtonesho tantiashun: —Abu cuēdquin chiaid dada uanu —qeshobi: —Padi —caposhi Nuquin Papa yacnoshon chuiquin. —Abu cuēdquin chiaidtedi dada uainda. Padi. Utsibo chuiquin dada uainda —caposhi. Adoac dada uainquio iccombi.

⁵ Adnubien mayan bēda tsiembudcuenshun chian dapa nētincquin utsiucshun mananuc tincaboedēn ambibi podo abiucquio cadoposh. —Nuquin Papan isnubi abimbo chuiquidquio nebi —quequin tantiamenuen aden ambibi podo abiucquio cadoposh. ⁶ Adotanquin chuiposhi. —Tantia. Mibi chuinu. ¿Tsutsi nidaid uabi yec ēndenquimboshē icpampic? Aidi Nuquin Papa nēbi adquid yec nibēdantiapimbo iquendac. Adquid icquin abitedi uapampic. Abu uashun aidēn icquidtedi uapampic. Nidaid uashun aidēn icquidtedi uapampic. Acte uashun aidēn icquidtedi uapampic. Aden abitedi uaquidēn chiaidquio chuinu.

Nëbi Nuquin Papan ambi tantiacpadomboen icsambo icquido cuidquimbi abi tantiaquido abëdi tabadmendac. ⁷ Èbi padquid mayan bëda utsin shoncate sanamboedën: “Nëbi nainquin shoncanu,” cacpadënquio Nuquin Papan ambi chiampicpadomboen adoendac —queposh mayan bëda chuiquid dapa dacuëdampambo icquid Nuquin Papan matses cuidquin naimpanuda.

⁸ Adnubini abucuësh cuëdquidën chuiposh. —Aid mayan bëdan sanamboed dada uaid bed —cac: ⁹ —Dada uaid beccho —capombi. Adoaquien: —Në bed. Bedshun che. Batambo icboedi min ana mucambo yanendac —caposhi. —Nëid bedshun chiacbimboen Nuquin Papan chiaid cuishonquequin isban-isbanash mucambo yanacimboec Nuquin Papan cuidte tantiaash shubitiadquio mibi yanendac —quequin tantiamenuen aden chuiposhi.

¹⁰ Adoac aid bedshun chiash adquio yanobi. ¹¹ Adquio yansho isun mayan bëdabo chuiquid dapan chuioposhi. —Nuquin Papan ambi chiaid tantiamiac matsesën nabante dadpen mimbi chuibanendac. Nidaid utsi-utsiec yacno tabadquidon nabantebëdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bëdabo chuiquid dapan.

11

Nuquin Papan namiaidon daëdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioposhi. —Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin

bëdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta. ² Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” qeshun aid shubu daquënë uaid tambanenda. Aden Edusaden icsa uaquin seta 3tedi matamendac —quequin chuiposhi. —“Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi. ³ Adnubini Nuquin Papan chuiposh. —Aden Edusaden icsa uanubi matses daëdquibi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid abi icsaid ëmenuec dashcute icsactsëcquidquio dasiuidendac —quequin Nuquin Papan chuiposhi.

⁴ Adshobini mayan bëdan chuioposh. —Aido Nuquin Papan oncamiaid daëd isadaidbo matses tsusedpan chuipampid nendac. “Nuquin Papan bëntsiauc cuëte odibos caid nitsinaid daëd bëdambo icquid iquendac. Ambobidi tabote daëd bëdambo icquid iquendac,” quequin chuipampid nendac. “Nuquin Papan Mayanën tantiamiaidquio icquin ambi chiaidquio chuibanendac,” camenuen aden chuipampic. ⁵ Aden abi chuibansho abi chieshënquidën: “Mibi cuesunenu,”

caqui cunesuniadenquoio iquendac. Nuquin Papan dayun uaid icquin ana shëcuënuësh choboedën nibëdquiecnuc pichicacimboen abi cunesunenuedotedi unës uaindac. Nuquin Papan cuidte tantiamenuen adoendac. ⁶ Adembidi Nuquin Papan cuidte tantiamenuen Nuquin Papan Mayanën namiaidquoio icquin comapenen tantiaquin ismebanendac. Aden ismequin nac abi nidabi yacpadequi ue choenquoio iquendac seta 3tedi matamec. Adembidi aidon acte intacuaindac. Adembidi ambibi tantiacpadomboen comapenen tantiaquin dacuëdampamboecquin matses shubimendac Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun nainquin naindac. Aden nainshobien matses chuiquid icsamboshë icquidën bëdi dapabimboecquidën abidaëdi cunesun secaindac. Satanasën namiacpadomboen adoendac. ⁸ Edusaden yacnoshon cunesun secashun chococainquoio iquendac. “Ma cunesun secaid ischitono,” queshun chococainquoio icquin podqued ansanendac. Nuquin Icbo Esus cuesten dectanacnoshonquoio matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cunesun secaindac. ⁹⁻¹⁰ Aden cunesun secabosh: “Nuqui mëyanquid nëid daëd neque. Chococatiapimbo iquebi,” queshun chococainquoio iquendac. Adashic matses abitedimbo cunesun secaboed isbededec tabadendac. “Nuqui shubimequido cunesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquoio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cunesun secaboed isbededec tabadendac — quequin chuiposhi mayan bëdan.

¹¹ Adashic abi onquec: —Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac. ¹² Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac. ¹³ Aid daëd abuctonoc nidaid saca-sacaquemboec natiambo uëdëquianendac. Nidaid uëdëquenubi shubu dadpenquio chimeshadbudnendac. Chimeshadbudnequimbi matses catashquin dadpenquio 7,000tedi unës uabudnendac. Adnubien unësabi icquido dacuëdcuededendac. Dacuëdequi: “Nuquin Papa dacuëdampamboecquidëmbien nash. Aidquien tantiatiad,” quecuededendac —quequin chuiposhi mayan bëdan. ¹⁴ Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec.

—Nuquin Papabëdi aton Mado Esuquidistu abided ciudadec unësaid bëdamboshë iquec.

Abi chieshënquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icho nec

—quec cuëdëncuededposh. ¹⁶ Adashic Nuquin Papa yacnombo icbo-icboec tsadten tabadboedobi tsusiobo 24tedi icquido: —Mibi bëdamboshë iquec —quequin ismec danëshën tinquebudcuededposh. ¹⁷ Adtanequi nadec cuëdëncuededposh.

—Nidaid uabi yec ëndenquimboshë mibi icpampic, Papa.

Nēbi adquid yec nibēdantiapimbo icquid mibi nec.

Abitedishun Icbombo mibi icnuc:

“Ēmbiquen dēniacquin namenu,” Satanasēn catiapimbo mibi iquec.

Nadatiambo icquid icquin mimbentsēqui matses abitedimbo mimbi namendac.

¹⁸ Nidaid utsi-utsiec yacno tabadquidon abi chuiquidobēdtan mibi chieshēdenec.

Mimbi uaidtedi icsa uadenec.

Adsho mimbi tantiacpadēnquio nēbi mimbi cuidendac.

Matses abitedi uincuemetanquin mimbi chiaid niacniaquec icsaquido mimbi cuidendac.

Adoshombic mimbi chiaid chuibanquidobēdta mibi tantiaquido abitedimbo mibi yacno mibēdi mimbi tabadmendac.

Chuiquid dapambobēdta chuiquidpenquio mibi tantiaquidotedi bēdambo icmequin mimbi adoendac

—quequin tsusiobon Nuquin Papa chuisho tantiapombi ushquin isac bimboen.

¹⁹ Adshun isquien Nuquin Papa yacnombo con matses isadaidbon Nuquin Papa tabadte shubu uashunampid shēcniacchobi icposh. Aid shubu nuntan isaquien Moisesēn ambi nacnenaid Nuquin Papan chiaid sandoampid icposh. —Ēndenquimboshē ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ēbi ismenubien bed-bedquetanec abu teshquianiac bimboec nua cuēdtoneposh. Nidaid saca-sacaquemboec uēdēqueposh. Ue dapa nuamboshē choac bimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobēdta nisibimboecquid dapa ismiaid

¹ Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidacbimboec bëchamauanquiecsho ispombi. Inchëshën ushë tincash tsadposh. Uispa 12tedi nacnenaid mauete maueposh. ² Bacuë nua usunec tishtiadtsëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi. ³ Adnubien nisibimboecquid nuamboshë icquid choposh. Taë-chopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecuededposh. Satanas niosh. ⁴ Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsi-utsien yuapampic. Aden yuash aton yuabobëdi nidaidën choshon matsesetsen icsamete bunquiec —camenuen aden ismeposhi. Adshumbic chidon tishacsho bacuë penuen aiduidi bëisquin cainuidposh. ⁵ Adnubien chidon dada bacuë tishposh. Bëdambo icquid matses abitedishun Ibo ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi. ⁶ Adnubien chido nëbi bacuë tishboed nisibimboecquid dapa cuenë nec matses nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquio seta abentsë chotsecnuc matamequin. —Aden Esus tanti-aquido Nuquin Papan dayun uaindac —camenuen aden ismeposhi.

⁷ Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Sa-

tanaskuobi. Nēidic mayan bēdabo icboedobi Nuquin Papan chiaid niac-niaquec icsash podobitsi icsabo yanaido Satanasēn yuaido. Nēidic Nuquin Papabēd icquidombo mayan bēdabo dadpen. Nēidic aido chuiquid dapambo Miqued caid. Aidedi ispombi. Adnubien Satanas nadposh. —Aton yuabo mayan bēdabo cuemiash Nuquin Papa dēniaquec ēbimbo abitedishun icbo yantsiabi —quiash nicantiadquio icposh. Satanas chedo nidaidēn nidmiabi icnuc neposh. ⁸ Adshumbic: —Niunchitono —quequin bedbidan-bedbidanaquien Nuquin Papan yuabo Miqued chedo uidēnquio icquido yec niadenquio icposh. Adshumbic Miqued chedon nisibimboecquid Satanas chedo nicaposh. Aton yuabobēdta Nuquin Papa yacnoshon nicaposh. ⁹ Nicaquien matses tabadacno nidaidēn choec Satanas chedo bud-budposh. Eba caid icsamepampid Satanas niosh. Nēbi matses dadpenquioshē icsamequin yuate bunquiec.

¹⁰ Adnubien Nuquin Papa tabadacnoshon anocquidēn comapenec onquequin chuibamposh naden chuiquin.

—Aden Nuquin Papan aton Mado Esusbēdtan abi dēniac-nuequido dēniacmenquio icposh.

Nuquin Papa chieshēnquidquio icquin abi tantiaquido chieshēnquin icsamboen chuishunquid nec.

“¿Esus tantiaquido bēdambo icquidoda nedic? Ēmbi natiamiac aido chieshtotsiash,” quequin Nuquin Papa chuidenequid Satanas nec.

Satanas chedo cuemiash Nuquin Papa aton Mado Esus abided cuidadec unēsaidbēdi dēniacadtiaipimbo yec abitedishun Icbombo nec

—queposh Nuquin Papa yacnuēsh cuēdec. ¹¹ Adashic padpidec auēshbidi:

—Nēbi ēmbi isac Satanasēn Esus tantiaquido chieshtometiapimbo icposh.

Satanasën: “Chieshtomenu,” caqui:
 “Padi. Esusën yuambo nebi,” quec chieshtoenquio icposh.
 Cuidmenquio icnuec abided ciudadec unësaid Esus
 tantiec chieshtoenquio icposh.

Adsho abi chieshënquidon matsesën: “Padi. Esus
 tantienda. Cueschitomane,” caqui
 chieshtoenquio icquin adenuidi Esus tantiasho cuesun
 secameposh Satanasën aton yua icmiambobi.

¹² Satanas cuemiaid tantiash cuishonquenuna.

Nuquin Papa yacno tabadquidotedi nuquibi cuishonque-
 nuna.

Ëbitedi cuishonquenuc nidaidën tabadquido matses yec
 mibi cuishonquetiapimbo iquec.

Nëshun cuemiac mibi yacno budash Nuquin Papa
 chieshënquiec Satanas chieshëmënquiec tabadec.

Mibi icsamete bunquiec. “Nëbi Nuquin Papan ëbi
 cuidquieque.

Abi tantiaquido yuashunchitono,” quec mibi icsamete
 bunquin mibi natiambo icmendac.

Adoac natiac mibi tabadendac

—queposh Nuquin Papa yacnuësh cuëdec. Aden tanti-
 ameposhi.

¹³ Adshumbic ëmbi isadaidbon chido isboed padpiden
 ismeposhi. Adoac Esus tishquid isadaidbon chido unës
 uanuen nadancasho ispombi. —Nuquin Papa yacnoshon
 nicachitoshi —queshun chieshënquin nisibimboecquid
 Satanasën aid chido nadancaposh. ¹⁴ Adnubien Nuquin
 Papan chiqui dapan podobiecquid meniac bedanec aid
 podombi cuenec matses nibëdacnombo Nuquin Papan
 tantiacnombo chido cuemposh. Anoshombi nisibimboec-
 quidën icsa uatiapimbo icnuc Nuquin Papan aid chido
 dayun uaposh. Seta abentsë chotsecnuc matamequin
 dayun uaposh. ¹⁵ Adnubien nisibimboecquidën: —Aid

chido unës uachitono —quequin ambibi ana shëcuënshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo mattses nibëdametiadquio iquec. Adembidi Esus tantiaquido nibëdametiadquio iquec. ¹⁶ Acte dapa chomiacsho isun Nuquin Papan nidaid shëcuë uashun aid shëcuën acte nidmiosh chido yacno chiuidenquio icnuc. ¹⁷⁻¹⁸ Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquiosh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uquëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Eëbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampaccosh. ² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac mattses abitedimbo chuiquid dapambo yamposh. Aden Satanasën mattses icsamboshë icquid chuiquid dapa icmequin ismeposhi. ³ Adshumbic padpiden ismeposhi. Adoac aid bëdi dapabimboecquid acte uquëducuësh choboedën

mapi abentsëc mëmuntiapimbo icnuc cuesuniaid uincuemiaid icsho ispombi. Aden uincuemiaid icsho isash: —Comapenen tantiaquidien nechitec —queshun matses abitedishun acte uquëducuësh choboedën chuiquid ic-samboshë icquidën chiacpadomboenuidi nabededposh. ⁴ Adshumbic: —Ëbi chuiquid dapa namequid mibi nec —quequin Satanas papa caquin matsesën tantiabededposh. —Aden Satanasën namiac ëbi chuiquid dapa padquid utsi nibëdec. Comapenen tantiaquidquio icnuc utsibon nuqui cuesun secatiapimbo iquec —queshun abi chuiquid dapa acte uquëducuësh choboedtsen tantiaquiposh. ⁵ Aden matsesën tantiaid icquin Satanasën tantiamiacpadomboen Nuquin Papa chieshënquiec: —Nuquin Papa caid nibëdquiec. Ëmbiuidtsëqui namembi —quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin. ⁶ Aidën Nuquin Papa chieshënquin naden muauaposh. —Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh —quec muaposh. ⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. —Matses icsamboshë icquid matses abitedi chuiquid dapa iquendac —quequin ushquin isac bimboecnuc ismeposhi. ⁸ Aid caic matses abitedishun: —Nadatiambo icquid nec —quequin tantiaquiendac. Aid tantiaquido Esus tantiesabo nendac. Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tan-

tiaquido icsho mibi chuinu. ¹⁰ Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiash mimbi nacpadequi chieshtoenquoio icta. Chieshtoenquoio icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquio icmiacpadec dacuëdampamboec onqueposh. Bëdambo icquid damianquien muaquin chuibanquidquio niosh. ¹² Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh. ¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh. ¹⁴ Aden Satanasën namiacpadomboen comapenen tantiaquin ismiac matses dadpenshun: —Abimbo caic —quequin abi chuiquid dapa icsamboshë icquidën chiaid nabededposh Nuquin Papambo tantienquoio icquin. Abi chuiquid tantiamequid nidaid shëcuënuësh choboedën: —Nuqui chuiquid dapa uincuemiaidquio icsho tantiaquin abibimboecnuc nuamboshë icnuc nacnenta —cac matsesën nacnemposh. ¹⁵ Nacnenacsho isun Satanasën namiacpadomboen nidaid

shëcuënuësh choboedën abi chuiquid dapabimboecnuc nacnemboedi tibocameshun oncameposh. Adoaquien nacnemboedquiobi chuiquid dapa icsabimboec onquequin: —Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatamposh. ¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquio dada uaquin bësiadmeposh nëidtedi. Nëidic chuiquid dapabo. Nëidic chuiquidpenquio. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquio. Aidtedi matses dadpenquioshë dada uaquin bësiadmeposh. Utsi-utsien bëtanteteno bësiadmeposh. Utsi-utsien mëdante abiucquio mësiadmeposh. —Acte uquëducuësh choboedën ëbi chuiquid dapan yuabo nec —queshun nameposh. ¹⁷ Adshumbic nidaid shëcuënuësh choboedën chuiquid. —Adec ëmbi chiacpadec siadambo icquido piucquidbëdta mitsana utsi menenda. Ëmbi siadmiaiduidtsëqui mene —queposh. Utsi-utsiec abi chuiquid icsamboshë icquid cuëmëdquid dada uaquin bësiadmiaid neposh. Utsi-utsiec aid cuëmëdaidbimboecquid naden 666 dada uaquin bësiadmiaid neposh. ¹⁸ ¿Ada ëmbi chuiquid tantio? Bëdamboen tantiaquidën: —Abi cuëmëdquidquio chienquio icquin naden 666 chuiquin dada uapac —catsiash. —Adec matses icsamboshë icquidquio chuiquid dapa yansho isun bëdambo icquid danenda —quequin ushquin isacbimboecnuc aden ismeposhi.

14

Nuquin Papan cudasënaido ismiaid

¹ Adoshombic padpiden ismiac abided cuidadec unësaid Esusquio macuësh dapa Sion caid mananënquio

tabadsho ispombi. Abëdi abi tantiaquido dadpenquio 144,000tedi tabadposh. —Con na neque. Chën — quequin cudasquin Nuquin Papan abi cuëmëdquidbëdta Esus cuëmëdquid dada uaqin bësemiaido niosh. — Adec Esus tantiaquido abëdi tabadendac —quequin aden ismeposhi. ² Adnubien Nuquin Papa yacnuësh ¿midapadpamboec cuëdtoposh? Acte nua chododoquiacbipamboequien niacbiposh. Abu tesquianiacbipamboequien nechitosh. Ten-tencate dapa dadpen icbo-icboen sananquin ten-tencacbipamboec comapenec cuëdëncuededposh. ³ Adec Esusbëdi macuësh mananënquio tabadboedo 144,000tedi icquido cuëdëncuededposh. Nuquin Papa chuiquid dapan tsadten tsadacnombo cho-choash tabadec cuëdënte chucan cuëdëncuededposh. Tsusiobo 24tedi icquidobëditan dadanobi ëshëcquido 4tedi icquidën ambobidi tabadquin tantianuc adcuededposh. Abi ic-said bedshunuec abided cuidadec unësaid Esus tantiaquidon matsesënuidtsëqui aid cuëdënte chuca tantiec cuëdënosh. ⁴ Aido Nuquin Papa yacno nidabi yec nidaidën tabadnuc matses utsibo abitedimbo icsamboecshë tabadnubi aidoen bëdamboec tabadpanëdash. Utsibon Nuquin Papa Esusbëdta tantiatipimbo icnubi aidombien tantiaquiopanëdash. Abided cuidadec unësaid Esus tantiaquid icquin ambi chiacpadomboen nabampanëdash. Adonëdaid icquin Nuquin Papabëdta Esus cuishoncamequidombo niosh. ⁵ Chieshtoenquio icquin Esus tantiec muesabo icpanëdash. —Adquido iquendac —quequin ushquin isac bimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenac bimboec abuc cuensho ispombi. Bënudtipimbo icquid Nuquin Papan chiaidquio matses chuinuec niosh nëidtedi. Nëidic

matsesquio. Nëidic matses utsibo. Nëidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuineuc niosh. ⁷ Abuc cuenquimbi chuibemposh. —Nuquin Papauidtsëqui tantiata. “Abu uaquinc nidaid uaquinc acte uaquinc caquid bédamboshë iquec. Abipadquid utsi nibédquio iquec,” quequin tantiata. Nëbi ambi chiaid niac-niacquido cuidquieque. Aidquio tantiata —quequin chuibemposh abuc cuenquimbi.

⁸ Adnubien mayan bëda utsi abuc cuenoaposh. Cuenquimbi naden chuibenoaposh. —Shubu dadpen icquid Babidonia caid yacnocquido icpampidobimboec icsamboshë icquidobidi icsho Babidonia yacnocquido caimbi. Aidon uisma uanten danoshcacobimboen matses utsibo abitedi Nuquin Papa tantiamenquio icquin icsamequiosh. Aduidequi icsho ëndenquimboshë cuidampicpadomboen Nuquin Papan uesquin cuidquiendac —quequin chuibemposh mayan bëda utsin abuc cuenquimbidi.

⁹ Adnubien mayan bëda utsitsen abuc cuenoaposh. Aidëntsen chuibenoaposh. —Tantia. Nuquin Papan cuidtequido chuinu. Chuiquid dapa icsamboshë icquid acte uquëducuësh choboed tantiaquin aidbimboecnacnenaaid tantiaquioposh. Aden abi chuiquid icsamboshë icquid tantiec: “Aton yua nebique. Ismenu,” quiash ambi tantiaidën chiacpadec utsi-utsiec bësiadcuedednubi utsi-utsiec mësiadcuededposh. Aden abi chuiquid icsamboshë icquid tantiaquidon abi tantiatiapimbo icsho Nuquin Papan cuidquiendac. ¹⁰ Aidtedi chuiquid icsamboshë icquidën yuabo icsho icbobëdtabi Nuquin Papan nëishënquioshon cuidquiendac. Icsaquido cuidquiacno chian anëdënquiacno nësecain adoendac. Abided ciudadec unësaid Esusënquio mayan bëdabobëd-

tan isnubi adoendac. ¹¹ Ĕnenquoio icquin adoendac. Aden Nuquin Papa chiesh nquidquo tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquoio icquin adembi cuidquiendac  nenquoio icquin — quequin chuibemposh mayan b dan. Aden ismeposhi.

¹²  mbi chuibloed tantiashun mimbi nabocpadom-boembi chieshtoenquoio icquin Esus tantiaquin ambi chiacpadomboenuidi nabanta. Utsibon chiesh nquin: — Padi. Esus tantienda. Cueschitomane —caqui adenuidi  nenquoio icquin Nuquin Papab dta Esus tantiaquiota.

¹³ Adnubi Nuquin Papa yacnu sh comapenec onquequin chuioposhi. —Naden chuiquin dada uata. Chiesh m nquidon: “Esus tantiec,” qeshun cuesun secaido Esus tantiaquido cuishonquendac —quequin chuioposhi. Adnubien Nuquin Papan Mayan ntsen: —Ai, abimbo caosh. Esus tantiaquido natiaic tabadtenedobi un sash b dambosh  iquendac shubitiapimbo yacno tabadec. Ambi chiacpadquiec b damboec tabadec un sacsho Nuquin Papan aden b dambosh  icmendac —quequin chuioposhi.

Intac nua icnuc Nuquin Papan cuidtequid chiaid

¹⁴ Adoshombic padpiden ismiac abu ushunquoio Esus tsadsho ispombi. —Abitedishun Icbombo nebi — quec chuiquid dapan mauetempo shocosh nacenaid maueshun ch shtebimboecquid sanamposh. ¹⁵ Adnubien mayan b da utsin abi yacnu sh choquin comapenec onquequin Nuquin Papan chuibloed Esus chuituidposh. —N bi nidaid n icquid sinaid butebanquin sando. Nuquin Papan tantiacpad n n bimbobi nata ¹⁶ —caquien ch shtebimboecquid n sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esus n buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec. ¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando ¹⁹⁻²⁰ —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho isombi ushquin isacbimboen. —Aden Nuquin Papan abi chieshënquido cuidendac —quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdabo niosh. —Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac —quequin tantiaquin ispombi.

² Nuquin Papa yacnobidi chian dapa icposh. Actepenquo yec acte-actectsēcquo isadposh. —Nuquin Papa icsaquido cuidquidquo nec —camenuc tied nēdēn-quiacbimboec aid bēntse isadposh. Aid cuēmambi Esus tantiaquido tabadposh. Satanasēn namiaidēn acte uquē-ducuēsh choboedēn chuiquid dapa icsamboshē icquidēn: —Yuanu —cauidaido niosh. Chuiquid dapa icsamboshē icquidbimboecnuc nacnenaaid tantiatiapimbo icquido aido niosh. Adecbidi icsamboshē icquidēn ancabudacpaden nainquo yec aton yuabo ictiapimbo yec aid cuēmē-daidbimboecquid 666 dada uaquin siadmetiapimbo icquido niosh. Adec abi tantiaquido icsho Nuquin Papan meniaid ten-tencate cuēdēmec cuēdēncuededposh.

³ Nuquin Papan namiaid Moises: —Nuquin Papan nac ēbi chieshēnquidon ēbi cuesun secainquo icposh —quec cuēdēmpampicpadec cuēdēncuededposh. Nuquin Papa bēdamboen ismenuc abided cuidadec unēsaidquo Esus aton Papabēdta tantiec cuēdēncuededposh naden chiec.

—Nadatiambo icquin nabanquidquo mibi nec, Papa.

Abitedimbo uaquidquo yec abitedishun Icbombo mibi nec, Papa.

Matsesēn naid abitedi tantiaquidquo abimbo chuiquidquo mibi nec, Papa.

Mimbi naid bēdambo icnuc dacuēdampambo mibi iquec, Papa.

Nidaid utsi-utsiec yacno tabadquidon Icbo icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icbo dacuēdampambo icquid neque.

Ambi chiacpadomboen nanuna,” mibi capashun, Papa.

Mibiuidtsēqui icsaisambo nec, Papa.

Adquid icquin mimbi chiacpadomboen icsaquido
cuidquimbi bēdambo icquido mimbi bēdamboen
isendac.

Adsho isun nidaid utsi-utsiec yacno tabadquidon matses
abitedishun: “Mibi bēdambo iquec. Con Icbombo
mibi nec,” caindac

—quec cuēdēncuededposh Esus tantiaquido.

⁵ Adshun isquien isadaidbon: “Nuquin Papa tabadte
nec,” quequin shubuampicpadquid shubu shēcniacchobi
icposh. Nuquin Papa tabadacnombo tantiamenuen
aden ismeposhi. ⁶ Auēshquio Nuquin Papan chiacpadec
ēm̄bi isboedo mayan bēdabo 7tedi cho-choposh. Mat-
ses icsaquido cuidquido niosh aido. —Nuquin Papan
yuabombo nec —camenuc dashcute nac-nacquio icquid
dasiuidcuededash dashcute bēshpiu-bēshpiumbo icquid
shictonquecuededposh. ⁷ Adsho isun Nuquin Papabēd
icquid dadanobi ēshēcquid abentsēcshun maspanēmpi
shocosh piu nacnenaid icbo-icboen menebamposh. Unēs-
tiapimbo icquidēn Nuquin Papan nēshēnquioshon cuidte
cushtoaid maspanēmpi niosh. ⁸ Adnubien Nuquin
Papa tabadaid nuntanuēsh pushud-pushudpambo ic-
posh. Adec dacuēdampamboecsho isash Nuquin Papa
chuinuēc puduedtiapimbo icposh. Ēnquin cuidambi
padpidec Nuquin Papa yacno puduednushi niosh. —
Abitedishun Icbombo yec dacuēdampambo icquidēn
ambi tantiacpadomboen icsaquido uesquin cuidendac
utsibon: “Chēn,” cadtiapimbo icquin —camenuen aden
ismeposhi.

16

Maspanēmpin cushtoaid

¹ Adec pushudacnuēsh abi tabadacnuēsh Nuquin
Papambo cuēdsho tantiombi. Maspanēmpi bedboedo

chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënschun chiuimposh. Adnubien ëmbi isboed acte uquëducuësh choboed chuiquid dapa icsamboshë icquidën yuaidotedi natiambo yec chiuë-chiuëtsëcquio yancuededposh. Satanasën namiaidquio icsamboshë icquid tantiaquin abibimboecnuc nacnenaaid tantiaquido yec aton icbo cuëmëdquid dada uaquin siadmiaido icsho aden cuidposh.

³ Adnubien utsin ambi bedboed maspanëmpin cush-toaid chian dapa mad caid nëchiuimposh. Adoaquien aid chian mad caid intacac. Ënden unësaidën intac bipamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh. ⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,”
caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec,
Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënsquidon cuesun secabudnepondash,” qeshun

cuesun secanquido cuidquin mimbi aton acte intacuashu-
nacsho isun: “Mibi bēdambohē iquec,” caimbi,
Papa

—queposh mayan bēda acte dayun uaquid.

⁷ Aden acte dayun uaquidēn chuisho tantiash Nuquin
Papa tantiaquin nēish pichicate dapa yacnuēshquio utsi
cuēdposh. —Ai, abimbo caic, Papa. Abitedishun Icbombo
icquin comapenen tantiaquidquio mibi nec. Adquid ic-
quin matsesēn naidtedi mimbi tantiec, Papa. Icsambo
icquidon naid abimbo chuiquin mimbi aido cuidec. Adsho
isun: “Mibi bēdambohē iquec,” Papa, caimbi —queposh
mayan bēda utsi.

⁸ Adnubien utsintsen ambi bedboed maspanēmpi cush-
toaid badiadēn ushē bēchiuimposh. Adoaquien Nuquin
Papan namiacpadec matses baded-badedquiec ushēn
pichiebudneposh. ⁹ Adec pichiebudneshumbien Nuquin
Papa chushcablededposh. —Icsauidequi icsho Nuquin Pa-
pan nuqui cuideque. Nuqui icsaid ēnash ambi chiacpadec
bēdamboec tabadnuna —quetiadquidēmbi chieshēnquin
abi cuidquidquio Nuquin Papambo chushcablededposh.

¹⁰ Adnubien utsintsen ambi bedboed maspanēmpin
cushtoaid chiuimbenequin acte uquēducuēsh choboed
chuiquid dapa icsamboshē icquid ambi namiaidobēd
tabadacno chiuimbeneposh. Adoaquien inchēshposh
inchēshquio yec. Badiadenquio icposh. Adsho isash
matses abitedi natiambo dacuēdcuededposh. ¹¹ Adec
dacuēdcuededec: —Ambi chiaid niac-niacsho Nuquin Pa-
pan nuqui cuideque. Nuqui icsaid ēnash ambi chiacpadec
tabadnuna —quetiadquidēmbi: —Natiambo chiuēmianec
Nuquin Papa icsambo iquec —queshun Nuquin Papa
chushcablededposh.

¹² Adnubien utsintsen ambi bedboed maspanēmpin
cushtoaid acte dapa Eupēdates caid nēchiuimposh.

Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

¹³ Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi. ¹⁴ Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. — Aidon namiac chuiquid dapabo abitedi aton yuabobëdi tsidadash ushë choacmiuëshquio cho-choendac. Nuquin Papa chieshënquin Esus chedo cuesun secanuec adec cho-choendac. Nuquin Papan tantiacpadënquiobi adendac —camenuen mayan bëdan aden ismeposhi.

¹⁵ Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiacbimboec icta ëbi cainec —queposh Esus.

¹⁶ Adnubimbi coqueshbimboecquid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid

yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambe-
mbi chiuinquin Nuquin Papan cuidte ënquimbi isme-
posh. Ambembi chiuinubien abi tabadacnuëshquio
Nuquin Papa cuëdposh. —Padi. Nëbi ëmbi tantiac-
padomboen ënquimbi cuidec —queposh. ¹⁸ Adnubien
abu bed-bedquetanepamboec abu tesquianenuc natiam-
boshë shëc-shëcquemboec nidaid uëdë-uëdëquiamposh.
Nuquin Papan tauamboen matses uambi adec nidaid
uëdëquiambo. Bëdiactsëc nidaid uëdëquedenedi ac-
quimboec uëdëquiamposh. ¹⁹ Adnubien matses dadpen
yacno Babidonia caid yacnuësh nidaid abichobi icboedi
3tedi yanec tiadbudneposh. Aden Nuquin Papan: —
Anocquido icsamboshë icquido nec —quequin Babidonia
caid yacnocquido uesquin cuidquioposh. Adec nidaid
uëdëquenubi nidaid utsi-utsiec yacno shubu dadpen ic-
quid yacno-yacnomboec shubu abitedi uesadec chime-
shadbudneposh. ²⁰ Nidaid uëdëquenubi chian dapa mad
caid yacno acte nënantan nidaid icquid abitedimbo nibë-
dambudneposh. Adecbidi macuësh abitedi nibëdambud-
neposh. ²¹ Abucuëshquio ue dapa choacbimboec ue tsasi
nuacquid dapa quidos 50 icnuc yuë tanaid dadpenquio
paëdbudnequimbi matses tish-tishbudneposh. Aden ue
tsasi dapan mëyansho isun padenquio ictiadquidëmbi
matsesën Nuquin Papa chushcabededposh. —Nuqui ic-
said ënshun Esus tantianuna —quetiadquidëmbi chush-
cabededposh. —Adquido iquendac —quequin ushquin
isacbimboecnuc aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuimboedën abentsëcshun chuiuamposhi. —Isec cho. Mimbi isboed Babidonia caid yacnocquido cuidte mibi ismenu. “Babidonia caid yacnocquido matses utsibo dadpenquio icsamete bunquido nec,” quequin chido chishpidabimboecquid acte dapa bëntse tsadsho mibi ismenu. “Adquid icsho Nuquin Papan cuidquiendac,” quequin mibi ismenu. ² Aido icsamboshë iquec. Matses utsi-utsien abi chuiquid dapabobëdta uisma uanten danoshcacbimboen Nuquin Papambo tantiamenquio icquin ambi chiaid niac-niacmequioposh. Aido cuidsho isec cho —queposh.

³ Adshumbic ushquin isacbimboecnuc ismeposhi. Nuquin Papan Mayanën tantiamiac masiuidquio yacno shubu nibëdacnombo chido aben icquid dapa catsadsho ispombi. Aben icquid piumboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi. ⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquo icquid chedo payuec aidbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcacbimboen: “Nuquin Papa caid nibëdquie,” quequin tantiamequin matses utsibo dadpenquio icsamequiendac —camenuen aden ismeposhi. ⁵ Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi

icsamboen tabadmequido nec —quequin dada uaid icposh. ⁶ Aid chido paëmbo icquid acacbimboec Esus tantiaquidon intac acash tantiadenquo yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: — ¿Mitsipadquiopequini ique? —quebudquiobi.

⁷ Adbudquioshobini aid mayan bēdan: — “Tantiadenquo iquec,” ¿quecta ique? Tantia. Chido chishpidabēdta abi catsadaid aben icquid chuinu. ⁸ Mimbi isboed aben icquid icsamboshē icquid ictenedi nēbi nibēdec. Yuecshun Satanasēn abi tabadacnoshon padpiden chomendac. Adoacsho yuecshun Nuquin Papan chian anēdēnquiacno nēsecaindac. Aden cuidabi Satanasēn chomebocsho isun Nuquin Papa tantiesabon: “Comapenen tantiaquidien nechitec. Matses nibēdanēdaidi uincuenashien choachitosh. Aidi tantianu,” caindac. Matses uabi icquin Nuquin Papan: “Ēbi tantiaquido iquendac,” cacmaidonquo adoendac —queposh mayan bēda.

⁹ Adshumbic padpiden chuiposhi. —Tantia. Ēmbi chuiboed bēdamboen tantiamenuen chuinu. Naden tantiamenuen aben icquidēn mapi 7tedi icquid mibi ismiombi. “Babidonia caid yacno matses icsa uaquido tabadacno macuēsh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi. ¹⁰ Aid chuiquid dapabo 5tedi nibēdnubi utsi abi iquec. Nēbi aidēn aton matses namec. Utsitsen choendac. Choshon aton matses nametantsequi badedquo nibēdanendac. ¹¹ Nibēdanēdaidi choashic ěmbi ismeboed acte uquēducuēsh choboed chuiquid dapa icsamboshē icquidquo iquendac. Aidēn ěmbi chuiboedo chuiquid dapabo 7tedishun namiacbimboen aton matses

icsamboenshë namendac. Adoacsho isun Nuquin Papan icsaido cuidquiacno nësecaindac —queposh mayan bëda.

¹² Adashic abi onquec: —Naden tantiamenuen aben icquidën pais 10tedi icquid mibi ismiombi. Chuiquid dapa utsibo 10tedi iquendac. Nëbi aton matses namiabi iquec. Padabi. Adquido yanendac. Satanasën acte yacnuësh choboedbëdta chuiquid dapabo icmiac matses icsamboenshë namiash yuec tabadabi badedquio nibëdanendac. ¹³ Nibëdanabi icquin aidon acte uquëducuësh choboed abi chuiquid dapambo icmendac. “Aidën namiac abi tantiaquidobëdta Esus nuquitedishun cuesun secatsiac nibëdquio icnuc,” qeshun aden icsamboshë icquid abi chuiquid dapa icmendac. ¹⁴ Aden Esus chieshënuquidon: “Chieshtomenu,” cac Esusën yuaido abi tantiaquidotedi chieshtoenquio iquendac. Aton Icho Esusën abided cuidadec unësaidën namiac chieshtoenquio iquendac. Aden abi tantiaquidobëdta chieshënuquin cuesun secanuec cho-chosho isun Esusëmbi cuesun secaindac. “Ëbien matsesën Icbombo nec,” quetanquin adoendac —queposh mayan bëda.

¹⁵ Adashic padpidec: —“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bëntse tsadsho mibi ismiombi. ¹⁶ Aden Babidonia caid yacnocquidon nasho isun mimbi isboed chuiquid dapa icsamboshë icquidën abëdtan chuiquid 10tedi icquidbëdtan Babidonia caid yacnocquido chieshënuendac. Aden chieshënuquin cuesun secatanquin shububëdtabi nëdëncaindac nibëdquiecnuc. ¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquëducuësh choboed chedo chuiquid dapabo icmendac. ¹⁸ “Matses utsi-utsien chuiquid dapabo aton

matsesbëdtabi yuaquid abi iquec,” quequin mibi chido chishpidabimboecquid nëbi ismiombi —quequin mayan bëdan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bëda utsi Nuquin Papa yacnuësh abucuësh budsho ispombi. Nuquin Papan icmiacpadquid mayan bëdabo chuiquid dapa yec bëchamauanquiecposh. ² Choshombic nua cuëdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibëdquiecnuc abi tabadteneconombo podobitsiuidpambo tabadendac. Ambobidi edesteuidquio tabadendac. ³ Babidonia caid yacnocquidon matses utsibo abitedimbo abi chuiquid dapabobëdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedequin Nuquin Papa tantiamenquio icposh. Adsho Nuquin Papan cuidquiendac —quequin mayan bëdabon chuiposhi. ⁴ Adnubien Nuquin Papa abucuësh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobëdi icsasho ëbitsen cuidquionoshe,” qeshun aidon namiacpadomboen nainda. Auëshquio niqueta —quesho tantiombi. ⁵ Nuquin Papa yacnoshombidi utsin chuiposh. —Ënëdenquio yec icsauidequi icsho isun ambi tantiacpadomboen Nuquin Papan cuidquiendac. ⁶ Babidonia caid yacnocquidon matses utsibo dadpenquio icsamequioposh. Aden icsamequido icsho Nuquin Papan nëbi nëishquioshon uesquin cuidquiopashun —queposh mayan bëda. ⁷ Adashic abi onquec: —Babidonia caid yacnocquido cuidtequido nec. Ambi naiduidi naquin

aton na dadpenquoio bedash: “Aidtedi dayun uaic bēdambo iquebi,” quepec Nuquin Papan cuidte tantienquoio yequi. Adsho tantiashun: “Natiambo icnuc comapenen cuidquiopashun,” caimbi. Otacquoio tantiec: “Nuquin matses yuabo dadpen icnuc nuqui bēdamboec tabadec. Chido niante bēnē unēsaid mēyadacimboec mēyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec. ⁸ Adsho ambi: “Nēbi ēbi cuidec,” cacmaidēnquoio cuidendac. Nuquin Papanquoio abitedishun Icbombo icquin comapenen tantiaquin nacnenquidquoio icquin badedquoio cuidquiendac. Aden dadpenquoio unēs uabudniacsho isash natiambo sedenquecuededendac. Aton pete nibēdquiecnuc natia bunendac. Aton shububēdi dadpenquoio nēdēnquendac —queposh mayan bēda.

⁹ Adashic abi onquec: —Adec Babidonia yacnuēsh nēdēnquec pushudtonesho isash: “Aidon namiacpadomboen Nuquin Papa tantienquoio icquin con na dadpen bedtenembi,” quequin chuiquid dapabon nadambocain sedencabededendac. ¹⁰ “Tantia. Nuqui tantiaido sidquebudneque,” quec uinte paēdtampamboec dacuēdtanash uanoshon isec tabadendac. Adec tabadec: “Aido unēsquimboshē iquec. Aton matses aton yuabobēdi dadpenquoio icpadenec. Ambi dayun uaid dadpenquoio icpadenec. Matses utsibo dadpen namepadenec. Aido tantiac unēsquimboshē iquec. Badedquoio uesquin cuidquiopac,” quec sedenquecuededendac Babidonia caid yacnocquido tantiec —queposh mayan bēda.

¹¹ Adashic abi onquec: —Babidonia caid yacnocquido aden cuidacsho isash utsibotsen: “Ēmbi meniaid bedshun piucquid dadpen menedenebi. Nēbi adquid nibēdquiec. ¿Tsuntsimbini ěmbi meniaid cuidquin piucquid menepatshashba?” quec sedenquecuededendac. ¹² Aidobidi:

“Nadquid Babidonia caid yacnocquido menequin piucquid dadpen bedtenembi. Nēidic shocosh piu. Nēidic shocoshquio. Nēidic casēdubimboecquid cuēnote bēdambo icquid. Nēidic dashcute bēdambo icquid. Nēidic dashcute piumbo icquid. Nēidic dashcute umumbo icquid. Nēidic sēntebimboecquid nacnenaid. Nēidic aben icquid edepanten shēta nacnenaid. Nēidic cuēte utsi bēdaidquio nacnenaid. Nēidic shocosh utsi nacnenaid. Nēidic cuēnote nac-nacquio icquid nacnenaid. Piucquid dadpen menequin adquidtedi Babidonia caid yacnocquidon bedpadenec. ¹³ Utsitsen dadpen bedpadenec. Nēidic batambo icquid sabimboecquid. Nēidic bēdambo nuadte. Nēidic bēdambo nuadec danoshquete. Nēidic acte paēmbo icquid. Nēidic bēchi. Nēidic pan nacentequid. Nēidic nēish yua baca caid. Nēidic nēish yua utsi obeca caid. Nēidic nēish yua cabayo caid. Nēidic matses antsadsho cabayon nimbanquin buante. Nēidic ambi chonoa uatequido matses ambi ampequin bedaido dadpen. Babidonia caid yacnocquidon aidtedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido — queposh mayan bēda.

¹⁴ Adashic abi onquec: —Abi piucquid menedenedēn dayun uaid nibēdanesho isash: “Aid matses bunaidquio ambi dayun uaid pete nibēdquiec. Ambi dayun uaid dashcute bēdambo icquidbēd aton na utsi dadpen abitedi nibēdquiec.” ¹⁵ quiash natiambo dacuēdec uanoshon isec tabadec sedenquecuededendac abi piucquid menedenedo tantiec. ¹⁶ “Aid matses tantiac unēsquimboshē iquec. Matses dadpen yuaquin matses dadpen namepadenec. Aton matses dashcute bēdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuid-

cuededenec. Utsimbic casëdubimboecquid shocosh piu nacnenaid payudenec. Utsibic casëdubimboecquid utsi payuec mësiuidtenec. Adec: ‘Con na dadpenquio icnuc bëdamboec tabadebi,’ quepadenec Babidonia caid yacnocquido. ¹⁷ Adsho isun Nuquin Papan abi ushëmbi cuidquiac ambi dayun uaidbëd aid matses badedquio nibëdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac. Nëidic cano dapa dancha icbo. Nëidic dancha icbobëd nidquido aton yuabo. Nëidic icbo piucquid meniash dancha antabëdtoquido. Nëidic nuëcquid bedshun piucquid bednuen menequido. Aidtedi uanoshon isec sedenquecuededendac. ¹⁸ Nëdënquec pushudtonesho uanoshon isash: “Adquido utsi nibëdec,” ¹⁹ quiash natiaquiec sedenquecuededendac. Adec shubiec: “Ëbipadquid dancha icbon bëaidtedi bedshun piucquid dadpen menedenedo tantiac unësquimboshë iquec. Is. Cuidquiac badedquio nibëdanaque,” quec sedenquecuededendac —queposh mayan bëda.

²⁰ Adashic mayan bëdabidi: —Ëbien cuishonquendac. “Nuquin Papa yacno tabadquidotsen ëbëdi cuishonque,” quequin chiendambi. Esus tantiaquido chuiquinc Esusbëd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshënquin natiamiacpadomboen mibi chieshënquido Nuquin Papan uesquin cuidquioshe,” quequin chiendambi —queposh mayan bëda.

²¹ Adnubien mayan bëda utsin uidënquio icquidënquio nidaid moco nuacquid dapa yuëmboshë icquid cadotanquin acquimboen acte nënebidanquimbi chuiposh. —Ëmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibëdquiecnuc. ²² Adoac aido

ictenecnombo nadimbo iquendac. Ten-tencate ten-tencainquo iquendac. Utsibobic cuëdënenquo iquendac. Utsibombic shoncate shoncainquo iquendac. Cuëte chëshun nacnenenquo iquendac. Piacbo macuesenquo iquendac. Nadimboshë iquendac. ²³ Tabote taboadaid nibëdendac. Dada aton chido ambi nëbi bedaidbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac. ²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

19

Chieshënquido cuidacsho isash cuishonquiaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tanti-aquien Nuquin Papa yacnuëshquo Esus tantiaquido dadpenquioshë comapenec cuëdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

² Muesambo icquin ambi chiacpadomboen naquidquio nec.

Abi tantiesabo ënëdenquo yec icsauidequi icsho cuidquidquio nec.

Adquid icquin: “Icsamboshë iquec,” quequin matses
utsibo icsamequido Babidonia caid yacnocquido
cuidquioposh.

Nuquipadquid Esus tantiaquido cuesun secacsho isun
cuidquioposh

—quec cuëdëncuededposh.

³ Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncaquin Babidonia
caid yacnocquido uesquin cuidquioshe

—quec cuëdëncuededposh Esus tantiaquido dadpen-
quioshë.

⁴ Adsho tantiash Nuquin Papa chuiquid dapan tsadten
tsadnuc abi dacuenadec tabadquido: —Nuquin Papa
Nuquin Icbo nec —quequin ismenuec danëshën tinqe-
budcuededposh. Adec tinqebudcuededequi: —Abimbo
caic. Nuquin Papa bëdambo iquec —quecuededposh
dadanobi ëshëcquido 4tedi icquido tsusiobo 24tedi ic-
quidobëdi. ⁵ Adashic auëshquiobidi abentsëc cuëdposh.

—Nuquin Papa matses uaquidquio yec bëdamboshë iquec,
canuna.

Nuquibi abi tantiaquidtedishun: “Nuquin Papa bëdam-
boshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun:
“Nuquin Papa bëdambo iquec,” canuna

—queposh.

Esusën abi tantiaquido beduante chiaid

⁶ Adsho tantiash abu tesquianiacbimboec acte nua
chododoquiacbimboec Nuquin Papa yacnocquido dad-
penquio cuëdëncuededposh.

—Abi chieshënquidon Nuquin Papa dëniactiapimbo
iquendac.

Ambentsëqui abitedimbo namendac.

Nuquin Papa bédamboshë iquec.

⁷ Nuquin Papa tantiec cuishonquenuna. Nuquin Papa bédamboshë iquec.

Dadan aton chido buntacquio beduanacimboen abided ciudadec unësaid Esusën abi tantiaquido beduan-shun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacimboec:

“Nëbien con Icbo chochitec,”

quiash Esus tantiaquido bédamboec tabadec.

⁸ Abi tantiasho Nuquin Papan bédamboen isaido yec abi icsaid ënash:

“Nëen con Icbo chochitec,” quiash bédamboec tabadec.

Aden abi tantiasho Esusën dashcute chuca ushumbo icquid dasiuinacimboen abitedi icsaisa icmendac —quec comapenec cuëdëncuededposh.

⁹ Adnubi mayan bédan chuioaposhi. —Ëmbi chuiboc-padomboen dada uata. “Isadaidbo aton chido bedquin aton matses cho-chomiash pemec bédamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuishonquequiec tabadendac,” quequin dada uata. Abimbo caimbi. Nuquin Papan chiaidquio chiec nebi —queposh mayan bëda.

¹⁰ Adsho tantiashini Nuquin Icbo danec ismenuec danëshën tinquebuduidpoc. Adshobini: —Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda —queposh mayan bëda.

Cabayo ushu catsadquid bédamboshë icquid

¹¹ Adshumbic abuc isquin Nuquin Papa yacno shëc-nepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: —Abi tantiaquidobëd cuëshëd-tiapimbo icquid yec ambi chiacpadomboen naquidquio Esusquio nec —quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh. ¹² —Matsesën ompodëmëdtiapimbo icquidquio nec —camenuc cuëte isquidquio icquidbimboec ëshë icposh. —Abitedimbo chuiquid dapambo nebi —quec mauete dadpen maueposh. Abi cuëmëdquid abi bëdada uadaid tantiadenquio icposh. Utsibon tantiatiapimbo icnuc ambentsëqui tantiante niosh. —Nuquin Papabëdtan Esusën naidtedimbo matsesën tantiatiapimbo iquec —camenuc adec bëdada uadaid ismeposhi. ¹³ Abi cuëmëdquid utsiembi tantiatsëccoc. —Nuquin Papapadquidquio yec abi tantiamianquid nec —quequin cuënaid niosh. Aton dashcute bëntse icquid cuidaidën intaquën punacbimboec piumboshë isadposh. —Abi tantiesabo cuidquidquio nec —camenuc aden ismeposhi. ¹⁴ Esus bëyuc nidnuc abi tsibanec abi tantiaquidobëd mayan bëdabo cabayo ushucquidquidquio catsadcuededec cho-choposh. Icsaisa icmiaido yec dashcute ushumbo icquid bëchish nibëdquidquio dasiuidcuededposh. ¹⁵ Abi bëyucquid ana shëcuënuëshquio chështe cuënumbo icquid cueshqueposh. —Ambi chiacpadomboen matses icsaido abitedi cuidquidquio Esus nec —camenuc aden ismeposhi. Adquid icquin nidaid utsi-utsiec yacno tabadquido icsauidequi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ënë icnuc tish-tishacbimboen nua intac icnuc cuesun secaindac. ¹⁶ Aton dashcute bëntse icquidën abi cuëmëdquid utsi dada

uaccosh. —Abipadquid utsi nibëdnuc abitedimbo chuiquid dapambo yec abitedishun Icbombo nec —quequin dada uaccosh. Aton bëusudquid yacnombo adembidi dada uaccosh.

¹⁷ Adnubien ushë mëducquio tabadquin mayan bëda utsin edeste chedo abuc cuen-cuensho comapenec cuëdquin chuiposh. —Nuquin Papan cuidquin cuesun secaidon nami chec cho-cho. ¹⁸ Ĕmbi chiacpadec cho-choshon matsesën nami mimbi nua tëpuisquin chendac nëidtedi. Nëidic matses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquo. Nëidic bacuëbo. Nëidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëdu-cuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash cho-choposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquo abi tsibanquidobëdta cuesun secanu —caqui ²⁰ cuesun secadenquo icposh. Adshobien Esusën acte uquëdu-cuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncami-aidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquo niosh. Adec muaquin abi chuiquid dapabimboecnuc nacnemequidtsen niosh.

Adecbidi: —Ĕbi chuiquidĕn yuabo nec —quequin matses dadpen bĕsiadmequid niosh. Adec icsamianquidquio icsho bedposh. Abi chuiquid dapabĕdta bedshun unĕs uabi chian dapa ĕnĕdenquio yec anĕdĕnquequid icsamboshĕ nuadquidquio nĕsecaposh. ²¹ Adshumbic Esusĕn ana shĕcuĕnuĕsh chĕshte cuĕnumbo icquid cueshquequidĕn: —Ĕbi chieshĕnquidotedi unĕsta —caquien chochoboed utsibo abitedi unĕsbudneposh. Adsho isun caimboedon edeste chedon nua-nuaic tĕpuisquin matsesĕn nami chebededposh. —Aden Esusĕn abi chieshĕnquido nibĕdamendac —camenuen aden ismeposhi.

20

Satanas uidĕn uaid

¹ Adshumbic padpiden ismeoposhi. Adoac mayan bĕda utsi Nuquin Papa tabadacnuĕsh budsho ispombi. Podobitsi icsabo Satanasĕn yuabo shĕcuĕn tabadacno bĕtashaid chictĕbĕdta shocosh bucubimboecnuc nacnenaid dapa sanamposh. ² Adshumbic Eba icsamenuec nisi-pampid Satanasquio bedposh. Bedtanquimbic shocosh bucubimboecnuc nacnenaidĕn ambi sanamboedĕn uidĕn uaposh. ³ Uidĕn uatanquimbic aton yuabo uidĕn uacno shĕcuĕ aneposh. Adotanquimbic shĕcuĕ bĕtashquiosh puduentiapimbo icnuc. Seta dadpenquio 1000tedi matameshun bĕtashte chicshun Satanas cuemenuen adoposh. —Aden seta 1000tedi matamiabi icquin abi uidĕn uactedembi matses muauaquin icsametiapimbo iquĕc —qeshun chicten bidiacquin uidĕn uaquiosh. Aden ismeposhi.

⁴ Adshumbic utsitsen ismeoposhi. Adoac chuiquidĕn tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo chuiquido icquin Esusbĕdtambi

matsesën naid abimbo chuibamposh. Aden matses bëdamboen nameposh. Satanas uidën uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabëdta abibimboec-nuc nacnenaid tantiapimbo icquido neposh. Adecbidi: — Aidën yua nebi —quec aid chuiquid icsamboshë icquid cuëmëdquid dada uadec bësiadtiaximbo icquido niosh. Utsibic mësiadtiaximbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiatic tabadposh. ⁵ Unësaidotedi uincuemi-ambo icposh. Nuquin Papan ambi tantiactedi tauaquin uincuemeposh. —Seta 1000tedi matameshun utsibo abitedi uincuemendambi —quequin adoposh. ⁶ Adnubien tauaquin uincuemiaido bëdambo yec cuishonqueposh: — Padpidec unëstiaximbo iquebi —quiash. —Adquid icquin Nuquin Papan yuabo yec: “ ‘Esusbëd Nuquin Papa bëdamboshë iquec,’ canuna,” quequin chianequid nendac. Aid seta 1000tedi matamequin Esusbëdtambi utsibo bëdamboen namequid nendac —quequin aden ismeposhi.

Satanasquio chian anëdënquequid nëniaid

⁷ Adshumbic aidtedquio seta 1000tedi matameshun uidën uaid chicquin Satanas cuemendac. ⁸ Adoaquien matses icsamenuc muaquin chiec nidaid utsi-utsiec yacno nidendac. Aden aidën muaquin namiaquien matses dadpenquio Esus chedo cuesun sianuec tsidadendac. Nëidic nidaid Coc caid yacnocquido. Nëidic nidaid utsi Macoc caid yacnocquido. Nëidic matses utsibo abitedi cuëte podotedi dadpenquioshë.

⁹ Aidtedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nëdënquepamboecquid

budmequin uesquin pichicaindac. ¹⁰ Adshumbic aido icsa uamequidtsen Satanasquio bedshun acte uquëducuësh chondayd chuiquid icsamboshë icquidbëdta nidaid shëcuënuësh chondayd ënden nësecaondacnombo chian anëdënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

Ucsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. —Icsaisambo icquin matsesën naidtedi chuibanquin Nuquin Papan icsambo icquido cuidendac —camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanacosh padpidec isadtiapimbo yec. ¹² Nuquin Papa yacno unësaido uincuemiaindo abitedimbo tabadposh. Adnubien bëshunenquio icquin dada uaten dada uabanacbimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi tantiaquido abëdi tabadmequimbi abi tantiesabo comapenen cuidnun aden chuibamposh. ¹³ Unësaido abitedi icposh. Utsi-utsiec unësascho chian dapa mad caid nëniaido uincuemiaindo niosh. Utsi-utsiec nidaidën chococaid uincuemiaindo niosh. Adsho aidon naidtedi Nuquin Papan chuibamposh. ¹⁴⁻¹⁵ Adshumbic Esus tantiesabo icsho documento nibëdquidbimboecsho abi yacno tabadmenquio icquin chian dapa anëdënquequid uesquin nësecabamposh. Aden Esus tantiesabo nësecan unëstequido utsibo nibëdposh. Esus tantiesabo aton dada unësan abi tantiate tabadacno utsibo tabadenquio icposh. Adnubien Esus tantiaquido Nuquin Papa yacno tabadec unëstiapimbo icquidouidquio icposh. —Adquid iquendac —quequin aden ismeposhi.

21

Nuquin Papabëd tabadaidquoio

¹ —Esus tantiesabo chian anëdënquequid nësecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubëdi nidaid shëni nibëdnuc utsi chucambo icquiduidquoio icposh. Ënden iccondaid chian dapa mad caidtsen nibëdposh. ² Adnubien Esusbëdi Nuquin Papa tabadaidquoio abichobi Edusaden chuca caid abucüësh budposh. Chido nëbi bedboedën aton bënë cuishoncami-acbimboec cuishoncamiandquid yec bëdamboshë icposh. ³ Adnubien Nuquin Papa tsadacnuëshquoio comapenec cuëdposh naden chiec. —“Con matses nec,” quia sh nëbi Nuquin Papa matsesbëdi tabadendac cuëshëdenquoio yec. Adsho isun aton yuabo icquin matses abitedishun: “Nuquin Icbombo nuqui tantiaidquoio nec,” caindac. ⁴ Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucacimboec. Nidaid shënin tabadec abitedi unëstequiduidquoio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi päëmbo ictiapimbo iquendac — queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. —Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiquid. —Ëmbi aden chuiboed dada uata. Ëmbi muesambo icquin abimbo chiaid nec —queposh Nuquin Papa Esusbëdi.

⁶ Adashic Nuquin Papa padpidec onquec: —Ëmbi chuiboctedimbo nainquin naindambi utsibon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi.

Adquid yec abitedishun Icbombo icquin ëmbi tauaidtedi nainendambi. Adquid icquin acte bunac bimboec ëbëd tabadte bunquidon con Mado Esus tantiasho ëbëdi tabadmendambi. ⁷ Satanasën: “Chieshtomenu,” cauidaido Esusbëdta ëbi chieshtoenquo icquin tantiaquido ëbëdi tabadmendambi bëdamboshë yacnombo. Ëbi papa casho: “Ai, con mado mibi nec. Con champi mibi nec,” caindambi. ⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tantiauidtsëchoedobi chieshëmënuquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsamianquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquo chudquido. Nëidic aton bënëpenquo chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaïd chiuimboed abentsëc choshon chuoaposhi. — Isec cho. Chido nëbi bedboedën aton bënë cuishoncamiac bimboen abided cuidadec unësaid Esus cuishoncamequido tabadaïd mibi ismenu. Cho —caposhi Esus tantiaquido ismënuen. ¹⁰ Adshumbic Nuquin Papan Mayanën tantiamiac ushquin isac bimboen isombi. Mayan bëdan ëbi buanquin ispombi. Aden buanshun macuësh dapa mananënquo tsadumposhi. Adoac anoshon isquien abucüesh Nuquin Papa abi tantiaquidobëd abi tabadaïd abichobi shubu dadpen icquid budposh. Aid tabadaïd Edu-

saden chuca caposh. ¹¹ Aid tabadaidquio aid shubutedi Nuquin Papa tabadaid yec abi yacpadquio abichobi bëchamauanquiecposh. Casëdu bëdambo icquidbimboec isquid-isquidquio isadposh. ¹² Shubu abitedi nënantan icnuc abichobi daquënë uaid icposh. Abucquio icnuc daquënë uaid niosh. Daquënë uaid puduedte shëcuë 12tedi icposh. Aid shëcuë icbo-icboen isquid yec mayan bëdabo 12tedbidi icposh. Aid shëcuë bëtashte 12tedbidi icposh. Aid bëtashten Acobon mado cuëmëdquid 12tedbidi dada uabampaccosh naden. Bëtashten Acobon mado Ose cuëmëdquid dada uatanquin bëtashte utsin Acobon mado utsi Uda cuëmëdquid dada uatanquimbic adenuidi bëtashten bëtashtenquien Acobon mado cuëmëdquid cuëmëdquidquien dada uabampaccosh. ¹³ Aid daquënë uaid puduedte shëcuë ushë choauc 3tedi icposh. Ushë nibëdauc nodte yauc aitedebidi shëcuë icoaposh. Ushë nibëdaucbidi sud yauc aitedebidi shëcuë icposh. Ushë budauc aitedebidi shëcuë icposh. ¹⁴ Ambo tauaquin daquënë uadoquin nidaid cuënote nuamboshë icquid dapa 12tedi bedshun Esusbëd icquido ëbitedi cuëmëdquid 12tedi aid cuënote dapan abentse-abentsen dada uabampaccosh naden. Cuënoten ëbi cuëmëdquid Uan dada uatanquin cuënote utsin Petedo cuëmëdquid dada uapaccosh. Adenuidi cuënoten cuënotenquien Esusbëd icquido cuëmëdquid cuëmëdquidquien dada uabampaccosh. Adoshombic nidaid uëdëshcabanshun tauaquin sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

¹⁵ Adshumbic ëbi chuiboedën mayan bëdan shocosh

bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh. ¹⁶ Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh. ¹⁷ Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacnenaiduidquio yec nacnacquo icposh. ¹⁹ Aid daquënë uaqin tauaqin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umu-umumboctsëcquid dabitaccabampaccosh. Utsibic sapido caid umumbo icquid dabitaccabampaccosh. Utsibic acata caid ushumbo icquid. Utsibic esmedada caid umumbo icquid utsi. ²⁰ Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidedi dabitaccabanaccosh. —Nuquin Papa yacnombo bëdamboshë iquendac —camenuen aden ismeposhi. ²¹ Daquënë uaid puduedte shëcuë 12tedi icposh. Aid bëtashtetedi acte chiumbimboecquidën casëdu ushu

uaid nuacquid dapambo abichobi-abichobien nacenaid niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsēcquid acte-actectsēcquio icnuc mabiunaid icposh. —Esubëd Nuquin Papa tabadacnombo bëdambo icquiduidquio iquendac —camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashunaid nibëdposh. Ambo Nuquin Icho Esus abided cuidadec unësaidbëd Nuquin Papa icsho bëisquioquin tantiec anocquido tabadendac. ²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaid bedshunuec abided cuidadec unësaid Esusbëd Nuquin Papa bëchamauanquiequid icquin ambo ushëmbouidi icmendac. Inchëshaid tantiadenquio iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi. ²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo queneneq tabadcuenash: —Esubëd Nuquin Papa abitedishun Icbombo nec. Abipadquid utsi nibëdec —quendac. ²⁵ Nuquin Papa matsesbëdi tabadacnombo inchëshenquio icnuc: —Icsambo icquido puduednushe. Bëdashnu —quetiapimbo icsho isun daquënë uaid shëcuë bëtashenquio iquendac. Shëcniacchobi iquendac. ²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: —Daëdpactsēc tantiaquin matses daëdpactsēc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi. ²⁷ Ambo icsambo icquid puduedtiapimbo iquendac. Adecbidi omposhon

abi bunaiduidi naquidobëd muaquido puduedtiapimbo iquendac. Nuquin Papan bëshunenquio icquin dada uacimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdam-boshëuidquio iquendac —quequin aden ismeposhi mayan bëdan.

22

Nuquin Papa yacno acte ismiaid

¹ Adshumbic aid mayan bëdan padpiden ismeoa-poshi. Adoac Nuquin Papa abided cuidadec unësaid aton Madobëdquio tsadte dapan tabadacnuësh matses unëstiapimbo icmetequid acte bëdambo icquid nushan nibëdquidquio chëuëdsho ispombi. ² Nuquin Papa yacnuëshquio choec chëuëdec ambo tabadquido Esus tantiaquido tabadaid shubu nënantanquio chëuëdposh. Aid cuëmambi matses unëstiapimbo icmetequid cuëtetsen icposh. Baded-badedquie bacuëquidquio niosh. Inchëshën ushë choan-choanquie badedquio bacuëquid niosh. Aid cuëte podo nidaid utsi-utsiec yacno tabadquido bëdambo icmetequid niosh. —Aton Mado abided cuidadec unësaid tantiaquido abëdi tabadmequin Nuquin Papan unëstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abëdi tabadmequin Nuquin Papan daicsabudtiapimbo icquid icmendac —camenuen cuëte aton podobëdta ismeposhi. ³ Aden abitedi bëdambo icmiac cuidtequido nibëdquio iquendac. Icsambo icquido nibëdnuc Nuquin Papa aton Mado Esusbëd tabadac-noshon aid daëdi tantiaquie Esus tantiaquido tabadendac. ⁴ Adec: —Con bacuëbo nec —quequin Nuquin

Papan abi cuëmédquid dada uaquin bësiaidon Nuquin Papambo bëisquiec tabadendac. —Nidaidën tabadec bédamboec tabadquido Nuquin Papabéd tabadec abipadquio bédamboshë yanendac —camenuen aden ismeposhi. ⁵ Ambo bédambouidquio yec inchëshenquio iquendac. Nuquin Papa bëchamauanquiecquidëmbi ushëmbouidquio iquendac inchëshaid tantiadenquio yec. — Aden abi tantiaquido bédamboen isquin ënenquio icquin bédamboshë icmendac. Chuiquid dapabo icmiac Esusbéd-tambi ënenquio icquin namendac —quequin ismeposhi.

⁶ Adshumbic mayan bédan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaid-bon abimbo chuiquin dada uapampic. Adembidi aton Mayanën namiaid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi — queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. — Chieshtoenquio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bédambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bédan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec. ⁹ Adshobini: —Padi. Aden ëbi ismenda. Mibi-padquid Nuquin Papan yuabidi nebique. Èndenquimboshë Nuquin Papan tantiamiac min tsusedpabo isadaid-bon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin

Papauidsëqui tantiaquin aden ismeta —caposhi mayan bēdan.

¹⁰ Adashic padpidec: —Ĕmbi chuibamboedbēdta Ĕmbi ismeboedtedi chuiquin dada uata. “Nēid dada uaid isec onquequin ma Esus tantiaquidon tantianu. Nēbi adquid yanushe. Chieshtoenquio icquin Esus tantiec ma tabadnu,” qeshun dada uata. ¹¹ Nēbimbobi Esus chonoc Esus tantiesabo badedquio bēdamboec tabad-cuentiapimbo iquendac. Abi icsaid badedquio ĕntiapimbo iquendac. Esus tantiaquido abi bēdamboec tabadac-padquiecbidi bēdamboec tabadpashun —queposh mayan bēda.

¹² Adnubini Esusēn chuioposh. —Chieshtoenquio icquin ĕbi tantiata. Nēbimbobini choendac. Choshon matsesēn naidtedi tantiaquin icsaido cuidquimbi ĕbi tantiaquido ĕbēdi tabadmendambi. ¹³ Nuquin Papapadquidquio nebi. Ĕmbi tantiacmaid nibēdnuc abitedi comapenen tantiaquidquio nebi. Nidaid uabi yec ictenedi nēbi adquidquio yec nibēdantiapimbo icquid nebi. Adquid yec abitedishun Icbombo nebi.

¹⁴ Icsambo icboedon ĕbi tantiasho icsaisabimboecnuc Nuquin Papan bēdamboen isendac. Adshun ĕbi yac-nombo puduedmequin unĕstiapimbo icquido icmendac unĕstiapimbo icmiantequid cuĕte bacuĕ chemiacbimboen. ¹⁵ Padnuen ĕbi tantiesabo bēdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nēidic nēnĕchoquidobēdi cuĕte podo chodcashun unĕs uante bunquido. Nēidic dada cuididimbo. Nēidic chido chishpida. Nēidic aton chidopenquio chudquido. Nēidic aton bĕnĕpenquio chudmequido. Nēidic cuesanquido. Nēidic papa quequin ambi nacnenaidi tantiaquido. Nēidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

¹⁶ Ĕm̄bi chiacpadomboen mayan bēdan mibi ismebamposh. “Ma ēbi tantiaquidon iste dada uanu,” quequin Ĕm̄bi chiacpadomboen mibi ismebamposh. Nuquin Papan dada uamiac matsesēn: “Dabidēn tsyuecquid yec abitedimbo chuiquid dapa iquendac,” quequin chuiampid nebi. Isadaidbon cainaidquio nebi. Utsin: “Dēniacnu,” cactiapimbo icquid nebi. Adquid icquin matses abitedimbo namendambi —quequin chuiposhi Esusēn.

¹⁷ Adsho tantiashun Nuquin Papan Mayanēn tantiamicpadomboen chuiquin: —Nēbimbobi Esus chonoshe. Aidquio tantiabenta —caindac Esus tantiaquidon Esus tantiesabo chuiquin. Ĕm̄bi chuiboed tantiaquidtedishun: —Nēbimbobi chonoshe. Aidquio tantianuna —cac bēdambo ictsiash. Adsho tantiash Esus tantiesabo acte bunacimboec Esus tantiate bunsho Nuquin Papan bēdamboen isendac. Nuquin Papa bēdamboen ismenuen menete nibēdnuc Esusuidi tantiasho Nuquin Papan bēdamboen isquin abēdi tabadmendac.

¹⁸ Tantia. Ĕm̄bi chuiboed tantiaquido chuinu. Nuquin Papan: —Nadquid iquendac. Yuecash utsi iquendac —quequin ēbi ismeboedtedi dada uaombi. Ĕm̄bi dada uaboed tsitēnquin ambembi chiaid dada uainda. Ĕm̄bi chuibocpadomboen Nuquin Papan mibi cuidtsiashe. ¹⁹ Adembidi Ĕm̄bi dada uaboed utsi uainquio icquin abimbo chuita. Ĕm̄bi chuibocpadomboen Nuquin Papan mibi unēstiapimbo icquid icmenquio ictsiash. Adembidi bēdamboshē yacno abēdi mibi tabadmenquio ictsiash.

²⁰ —Ma aitedi tantianu —quequin Esusēn chiacpadomboen mayan bēdan aitedi ismeposhi. Ĕm̄bi chuibocpadomboen Esusēn: —Nēbimbobini choendac —caposhi. Adsho tantiashun: —Ai, nēbimbobi chota —capombi.

²¹ Mibitedi Esus tantiaquidotedi tantiaquin: —Ambi nabocpadomboen Nuquin Icbo Esusēn bēdamboen isquin

EUI 22:21

80

EUI 22:21

bëdambo icmepashun —caimbi. Padi. Aidedi chuiquin
dada uaombi.

Esuquidistu Chuiquin Tantiamete
New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

